

元

詩

紀

事

第

一

冊

PL
2534
.C4
v.1

PL
2534
.C4
v.1
YORK UNIVERSITY

JUN 5 - 2001

EAST ASIAN STUDIES

元詩紀事

陳寶琛署

石室遺本

原敘

唐宋金詩皆有紀事

金詩紀事未見傳本僅見數則於全金詩中

而元獨無錢竹汀先生嘗病元

史疎蕪欲採各家詩文集及筆記小說之類改修元史恐違功令改爲元詩紀事詳漢學師承記乃記合元詩紀事於元史藝文志統稱六卷而潛擘堂全書書目已刻未刻均未著紀事之名惟近人陳揆子準稽瑞樓書目於唐宋詩二紀事後載有元詩紀事二冊下注一鈔字据全目例鈔本也潘文勤敘稱子準歿書盡散翁文端公以重價收其藏本僅得三四則元詩紀事鈔本未知尙在其中否也獨念竹汀先生博極羣書尤熟元事果如計厲二書之徧採詩林故實其卷數必哀然以數十計而師承記所稱六卷除藝文志四卷已刻外紀事纔二卷耳稽瑞樓書目亦止云二冊何其少耶新修嘉定縣

志云五卷則合錢侗陶梁所補言之意其爲書必專取夫關繫元史得失者與計厲二書之體例異焉者也抑嘗論之宋詩紀事廣收無事之詩且多采從本集者宋詩經明人棄斥略盡吳之振宋詩鈔曹廷棟宋百家詩存總之不過二百家樊榭以人存詩重在網羅散失故也至元詩則顧選初二三集及癸集家數已燦然大備紀事之體當搜羅一代傳作散見於筆記小說各書者不宜復收尋常無事之詩矣歲在柔兆閏茂侯官陳衍石遺自敘

凡例

一有元詩人上多宋金遺老下多裸將有明今於宋金遺老涉元者如於宋金未登仕版則概入之元其已登宋金仕版入元未仕原不必援之入元顧選於元遺山羅澗谷諸人徑屬之元似欠斷限今仿全金詩列耆舊遺獻之意另編遺老一門附焉其元末諸人亦於元已登仕版者雖入明尙存仍列之元也

一女真蒙古譯語經清朝釐定諸家姓名如伯顏改作巴延桑哥改作僧格之類未易僕數但所採詩文集筆記小說多作伯顏桑哥等字今若遽標巴延僧格等字與所採之書兩相歧異轉令閱者茫然故仍之

一所採詩有一題多至百十首者則節錄其要如灤京雜詠百首

止錄有自注者五十四首趙待制詩詞卷十八首止錄三首勉
學詩二十四首止錄明詩綜誤收之一首此類甚多

一春帖子本係一絕句漁父詞向屬諸詩故間採入

元詩紀事總目

卷一

文宗皇帝 順帝

卷二

順帝太子

卷三

耶律楚材 劉潤之 呂鯤 耶律鑄 耶律季天

楊奐 劉祁 杜仁傑 楊鵬 楊果

趙衍 徐世隆 王磐 一庵 商左山

胡紫山 李冶

卷四

郝經

許衡

崔斌

高鳴

石國英

張弘範

王惲

張之翰

梁曾

徐琬

姚燧

盧摯

閻復

伯顏

王思廉

王宥

信世昌

陳伯通

李庭

耶律柳溪

員炎

撒竿

鄭雲表

卷五

劉因

方回

方存心

劉光

楊公遠

葉梅嶠

唐元

許古清

程鉅夫

葉李

元淮

李思衍

董恢

湯仲友

龔開

于石

杜伯高

呂起猷

許獻臣

卷六

葉林

鄧牧

陳觀國

劉堽

王義山

傅定保

張伯淳

洪德章

尹廷高

趙棠

連文鳳

馮澄

楊本然

全璧

呂文老

方德麟

劉汝鈞

翁合老

林子明

劉蒙山

周暕

趙必范

姚潼翔

胡南

姜霖

東必曾

方子靜

朱孟翁

趙必折

劉時可

許元發

洪貴叔

徐端甫

朱釋老

李萼

陳君用

蔡潭

俞自得

王進之

陳希聲

陳堯道

陳舜道

吳瑀

黃景昌

劉應龜

劉邊

戴東老

陳文增

劉存行

傅宣山

柳耆

俞如山

翁自適

郭建德

駱脩賓

陳帝臣

俞埜山

林泉生

傅九萬

章彬

彭九萬

卷七

戴表元

熊朋來

吳澄

倪南杰

胡長孺

黃泰亨

龍仁夫

羅志仁

白斑

張瑛

俞伯奇

仇遠

魯仕能

吳鉞

李應春

羅太呂

羅太亨

林清

卷八

趙孟頫

鮮于樞

吾邱衍

陳儼

黃玠

方夔

劉詵

劉彥章

陸文奎

黃庚

張觀光

虞德觀

卷九

陳孚

徐明善

馮子振

曹伯啓

鄧文原

宋无

艾性夫

朱浚

卷十

高克恭

李材

姚式

鄧楡

趙孟頫

李淦

李孟

袁易

戴天錫

盛彪

盧亘

袁桷

袁裒

鄧椿

吳延壽

顏天祥

錢資深

林宏

葉齊賢

陸桂

從大

黃肖翁

東南仲

孟淳

卷十一

虞集

王克敏

謝文質海牙

范玉壺

小雲石海涯

王士熙

柳貫

卷十二

梁相

吳元德

何中

周權

任士林

滕斌

龔璚

郭天錫

張菊存

何失

汪炎昶

陳森

段天祐

趙由儕

孫轍

郭道卿

林以辨

劉鶚

王振鵬

陳櫟

吳彬

貢奎

張養浩

馬祖常

李洄

黃潛

許晉孫

卷十三

楊載

范梈

揭傒斯

歐陽玄

何貞立

許有壬

許有孚

許楨

馬熙

趙恆

陸煥然 胡井表

卷十四

丁復 應夢虎 洪震老 辛鈞 陳繹曾

韓性同 汪澤民 吳萊 張翔 呂權

韓性 劉子郁 趙雍 葉森 鄭采

鄭禧 黃敏 汪子才 徐天賈 沈君清

胡炳文 宋本 吳師道 三寶柱 李好文

夏溥 劉麟瑞 洪希文 陳植 孫鳳洲

傅子建

卷十五

陳旅 傅若金 黃裳 宋褰 張仲容

元言紀事綱目
四
呂思誠

廖毅

陸居仁

李黼

薩都刺

胡善

卷十六

楊維禎

卷十七

朱仲明

楊得祿

汪志堅

胡元采

程維巖

胡祥

柯九思

哲理野臺

焦文炯

幹玉倫都

甘立

項炯

胡助

雅琥

楊瑀

赫德爾

林泉生

何正

黃鎮

陳楚春

卷十八

迺賢

余闕

李祁

王禮

宇文公諒

蔡廷秀

李介石

樊執敬

石抹宜孫

黃復圭

魯至道

陳柏

方瀾

濮彥仁

朱守諒

黃德廣

申屠駟

僧家奴

奧魯赤

卷十九

錢維善

盧琦

孔皖

李孝光

張翥

成廷珪

陸仁

高明

謝應芳

吳師尹

方子京

陳高

周志遠

鄭玉

陳謙

卷二十

楊允孚

達不花

周伯琦

貢師泰

卷二十一

黃公望

吳鎮

倪瓚

王冕

鄭韶

陳方

楊謙

沈良

張監

沈廷珪

鍾虞

何恆

石宇

黃仲瑤

鄧資深

倪維哲

趙次進

金灝

陳樵

卷二十二

潘純

謝宗可

郭豫亨

金涓

葉廣居

吳復

衛仁近

郭鉦

胡布

岑安卿

王士毅

朱子範

韓奕

劉渙

顧觀

沈貴

舒頌

周必達

李序

何景福

彭炳

羅蒙正

陳德載

程從龍

韓友直

潘時雍

顧素

沈貞

韓介玉

程渠南

魯琪琳

卷二十三

袁介

王禎

張端

俞俊

高志道

陳乾富

陳孔彥

周棐

察伋

陵希惠

施坦

熊不易

朱得先

師晦文

胡晉

何致中

汪士深

劉得之

梅德明

吳鏌

繆思恭

唐朝

林彥華

程彥明

李子飛

丁守中

吳漳

王東

潘伯修

王圭

王璋

李廷臣

曹文晦

錢岳

余寅

陸侗

趙覲

韓壁

唐奎

涂子約

卷二十四

郭翼

沈右

同同

唐棣

韓好禮

黃季倫

李廷臣

呂誠

賈策

堵簡

楊椿

邊魯

楊慶源

完澤

謝寅

徐夢吉

劉肅

李庸

康瑞

陸繼善

朱彬

歐陽公瑾

鄭賀

高克禮

屠性

李元珪

陳聚

張渥

陸元泰

馬稷

繆侃

任昱

蔣克勤

周溥

錢大有

留睿

張田

張師賢

顧敬

朱庸

李一中

陳樞

莊蒙

宋元禧

嚴恭

張世昌

馬貫

曹睿

馮士頤

不花帖木兒

掌機沙

聶鏞

郭庸

王立中

熊進德

徐哲

韋珪

盧浩

吳禮

申屠衡

姚文奐

張守中

沈性

燕不花

卷二十五

張昱

張簡

周霆震

卷二十六

陳有定

王翰

伯顏

林諫

吳訥

孔從善

丁鶴年

王逢

戴良

鄧定

董旭

卷二十七

顧瑛

顧佐

顧元臣

顧晉

黃文德

卞思義

瞿士衡

文質

時太初

顧亮

李費

林世濟

貢性之

吳志淳

陳思

吳敬夫

呂玄英

沙可學

邾經

曾朴

周南

趙沔

張翼

梁寅

魯淵

張思孝

鄧雅

卷二十八

割據

張憲

陳秀民

陳基

卞元亨

方行

劉仁本

謝理

王霖

諸綱

徐昭文

鄭彝

張溥

吳徹

卷二十九

寇賊

芝麻李

西昌寇

卷三十

遺老

元好問

白君舉

楊弘道

李俊民

段克己

卷三十一 遺老

趙復 汪元量 唐珏 林景熙 謝翱

鄭思肖 劉應鳳 周密 錢選 羅椅

劉辰翁 熊禾 梁棟 高晞遠 牟巘

李珣 魏新之 何鳴鳳 高鎔 陳傑

林月香 莫崙 錢仲鼎 孫嵩 孫巖

吳龍翰 曹良史 陳普

卷三十二 無時代

趙永嘉 金方所 項平父 于演 李宗洌

徐孟岳 吳仁叔 吳伯慶 楊鵬翼 張明

侯友彰 何有成 劉淵 郭正平 文若

李明中

張孟

張起

韞韞啞

卷三十三

道流

邱處機

王元粹

聶碧窗

梁大柱

馬臻

吳全節

李道坦

薛玄曦

黃石翁

王與敬

彭日隆

朱思本

張雨

鄒復雷

富恕

余善

于立

鄧青陽

方從義

卷三十四

釋子

子溫

有規

德豐

炳同

淨權

存誠

了慧

有在

溥光

明本

興恭

覺恩

行端

一初

圓至

善住

本誠

廣漩

壽甯

梵琦

祖柏

若舟

宗衍

文信

法智

祖銘

至剛

瞻

辨才

惟則

普惠

椿

良震

照

自悅

如阜

福報

寧

實

回

明

清濬

越僧

禪僧

游僧

無名僧

又

又

又

又

卷三十五

宮掖

駱妃

程一寧

凝香兒

順帝宮人

卷三十六

閨閣

耶律夫人

張阿慶

管道杲

管道昇

万俟蕙柔

杜氏婦

劉氏

陸蕙奴

張玉娘

賈娉娉

王嬌

余氏

吳氏

孫淑

鄭允端

劉氏

韓氏

李氏

萬氏

吳氏

曹妙清

張妙淨

薛蕙蘭英

盛貞一

趙氏

陳氏

范秋蟾

賈蓬萊

趙鸞鸞

劉翠翠

曠家婦

徐綵鸞

何氏

胡妙端

董淑貞

卷三十七

女冠

元氏

李翠娥

卷三十八

尼

妙湛

梅花尼

卷三十九

妓女

徐氏

羅愛卿

暨氏

卷四十 藩屬

阿蘊主

楊淵海

段寶

段僧奴

段明

陳日照

陳日烜

陳日燿

陳日燿

世子

陳遂

陳秀峻

陳元旦

陳愛山

黎崩

黎括

范邁

阮忠彥

阮聖訓

范五老

圓照

李齊賢

鄭可臣

柳淑

卷四十一

無名子

北客

何公

仙村人

東湖散人

感興吟

九山人

桑柘區

柳州

草堂後人

君瑞

青山白雲人

無機老農

子問

田農夫

唐人機軸

忘懷老人

五雲山人

老農

石姥寄客

雙澗

雲水

白雲人

跨犢者

缺名

山野人

盤隱末子

扶杖夫

廷雲

晚靜

竹簔笠翁

藍田道人

才人

翁某

鎮江郡人

康衢遺民

章某

郊居生

白縣尹

朽木居士

張某

某神童

無名子共三十二人

卷四十二

下

岳武穆

馬巫父

三茅吳真人

鄭文選

張君有

方武裘

王大圭

翠華仙伯

趙靜齋

獨樂園主

密蘭沙求仙詩

忠烈祠神

卷四十三

仙神鬼怪

羽客

懸胡盧詩

劉妙容歌

水仙祠神

衛芳華鬼

鄭婉娥鬼 華亭二生 仙方詩 晚翠亭詩 荊州鬼語

卷四十四

夢

大滌洞天仙人

夢中貫酸齋


卷四十五

歌頌銘謠諺識謎雜語共六十四首

元詩紀事卷一

侯官陳衍緝

文宗皇帝



帝名圖帖睦爾武宗次子初封懷王卽位改元天曆至順在位五年

黃文獻集天曆二年三月上肇開奎章閣延登儒流至順二年正月御製閣記成萬幾之暇親灑宸翰書閣記刻置禁中自建康之京都途中作

穿了襍衫便著鞭一鉤殘月柳梢邊兩三點露滴如雨五六箇星猶在天犬吠竹籬人過語雞鳴茅店客驚眠須臾捧出扶桑日七十二峯都在前

草木子梁王登寶位時自建康之京都途中嘗作一詩云云
月山詩話明太祖早行詩忙著征衣快著鞭轉頭月挂柳梢
邊兩三點露不爲雨七八箇星尙在天茅舍雞鳴人過語竹
籬犬吠客驚眠等閒擁出扶桑日社稷山河在眼前案此篇
乃元文宗自集慶路入正大統途中所作不知何以載入明
祖集中且竄易十數字又案居易錄云兩三條電欲爲雨四
五箇星猶在天乃五代盧延遜山寺詩文宗勦取之

順帝

帝名妥懽帖睦爾明宗長子在位三十六年改元元統至元
至正明太祖滅之奔沙漠元亡

北平錄以元主不戰而奔克順天命今殂特諡曰順帝

庚申外史瀛國公初爲僧居白塔寺中已而奉詔居甘州山寺有趙王者嬉遊至寺憐其老且孤留一回回女子與之延祐七年四月十六夜生一子明宗適自北方來早行見寺上有龍文五采氣卽物色得之因求爲子并載其母以歸

菽園雜記皇宋第十六飛龍元朝降封瀛國公元君召公尙公主時承錫宴明光宮酒醒伸手扒金柱化爲龍爪驚天容元君含笑語羣臣鳳雛寧與凡禽同侍臣獻謀將見除公主泣淚沾酥胸幸脫虎口走方外易名合尊沙漠中是時明宗在沙漠締交合尊情頗濃合尊之妻夜生子明宗隔帳聞笙鏞乞歸行宮養爲嗣皇考崩時年甫童元君降詔移南海五年乃歸居九重憶昔宋祖受周禪仁義綽有三代風至今兒

元譜緒事卷一
孫主沙漠吁嗟趙氏何其隆此詩爲閩人俞應所作至今兒
孫句言元君避歸沙漠後事

答明主

金陵使者渡江來漠漠風煙一道開王氣有時還自息皇恩何處不
昭回信知海內歸明主亦喜江南有俊才歸去誠心煩爲說春風先
到鳳凰臺

翦勝野聞元君旣遁留兵開平猶有覬覦之志太祖遣使馳
書明示禍福因答詩云云

御製詩

父疾精虔禱上天願將己算益親年孝心感格天心動恍惚神將帝
命傳

母渴思瓜正歲寒那堪山路雪漫漫雙瓜忽產空岩裏歸奉慈親痼疾安

榕陰新檢元王薦字希賢福寧人父疾禱天減年以益父壽父絕而復甦曰適有神人皂衣紅帔語我曰汝子孝上帝賜汝十二齡後果符其數而卒母沈氏病渴思啖瓜時冬月不得薦至深墾嶺植雪避樹下思母病仰天而哭忽見石岩閒青蔓離披有二瓜摘歸奉母渴遂止至正閒福建宣慰司上狀旌之御製詩云云

句

鳥啼紅樹裏人在翠微中

草木子上有佳句云云餘詳太子愛猷識理達臘下

（The text in this section is extremely faint and largely illegible due to the quality of the scan. It appears to be a continuous block of vertical text within the main frame of the page.)

元詩紀事卷二

侯官陳衍緝

順帝太子

太子名愛猷識理達臘順帝長子至正二十七年命總天下
兵馬二十八年國亡次年隨帝駐應昌府又次年帝殂明兵
襲應昌府太子從十數騎遁去

新月

昨夜嚴陵失釣鉤
何人移上碧雲頭
雖然未得團圓相
也有清光照九州

弇山堂別集草木子謂上有佳句烏啼云云天下誦之又皇
太子新月詩云云野史附之謂爲太祖及懿文不享年之證

草木子乃元遺民國初所著書謂上者順帝也皇太子者愛猷識理達臘也蓋以其不獲有天下而在東宮頗擅權故記之耳高帝集無此二句

列朝詩集建文惠宗讓皇帝下云鄭曉遜國記云帝幼敏穎能詩太祖命賦新月應聲云誰將玉指甲抓破碧天痕影落江湖上蛟龍不敢吞太祖悽然久之曰必免於難案葉子奇草木子餘錄載皇太子新月詩云云所謂皇太子者庚申君之子也野史以爲懿文太子作爲不及享國之讖而曉則以爲建文作考楊維禎東維子詩集此詩爲維禎作則諸書皆傳會也

案今東維子集共三十卷詩只兩卷並無此兩詩

元詩紀事卷三

侯官陳衍緝

耶律楚材

楚材字晉卿遼東丹王突欲八世孫金尙書右丞履之子元太祖召見處之左右太宗朝拜中書令薨於位至順元年贈太師追封廣寧王諡文正有湛然居士集

元朝名臣事略公以明昌元年六月二十日生文獻公通術數尤邃於太玄私謂所親曰此子吾家千里駒也他日必成偉器且當爲異國用因取左氏之楚雖有材晉實用之以爲名字

湛然居士集萬松野老行秀序湛然年一十有七受顯訣於

萬松其法忘死生外身世湛然大會其心精究入神三年盡
得其道萬松面授衣頌目之爲湛然居士從源湛然自是稱
嗣法弟子從源萬松一日過其門見其執菜根蘸油鹽飯脫
粟嘗和友人詩云贈君一句直截處只要教君能養素但能
死生榮辱哀樂不能羈存亡進退盡是無生路至於西天三
步遠東海一杯深老作衲僧未易及此

湛然居士集王鄰序中書湛然有天然之才或吟哦數句或
揮掃百張皆信手拈來非積習而成之如寶鑑無塵寒水絕
翳其照物也瑩然

西域河中十詠

寂寞河中府連薨及萬家蒲萄親釀酒杷欖看開花飽噉雞舌肉分

餐馬首瓜

土產馬首瓜大

人生唯口腹何礙過流沙

寂寞河中府臨流結草廬開尊傾美酒擲網得新魚有客同聯句無人獨看書天涯獲此樂終老又何如

寂寞河中府遐荒僻一隅蒲萄垂馬乳杞欖燦牛酥釀酒無輸課耕田不納租西行萬餘里誰謂乃良圖

寂寞河中府生民屢有災避兵開邃穴防水築高臺六月常無雨三冬卻有雷偶思禪伯語不覺笑顏開

寂寞河中府頽垣遶故城園林無盡處花木不知名南岸獨垂釣西疇自省耕爲人但知足何處不安生

寂寞河中府西流綠水傾衝風磨舊麥

西人作機軸

以磨麥動

懸碓杵新粳

西人以春懸

春月花渾謝冬天草再生優游聊卒歲更不望歸程

寂寞河中府清歡且自尋麻牋聊寫字葦筆亦供吟傘柄學鑽笛宮

門自斲琴臨風時適意不負昔年心

許得斲放宮門堅三尺
爲琴有清聲

寂寞河中府西來亦偶然每春忘舊閨隨月出新年強策渾心竹難

穿無眼錢異同何定據俯仰且隨緣

渾西人不計閨以十月爲歲有
心竹其金銅芽錢無孔郭

寂寞河中府聲名昔日聞城隍連畎畝市井半邱墳食飯秤斤賣金

銀用麥分生民怨來後簞食謁吾君

寂寞河中府遺民自足糧黃橙調蜜煎白餅糝糖霜救旱河爲雨無

衣壠種羊一從西到此更不憶吾鄉

庶齋老學叢談湛然居士集有河中府十首尋思干城西遼

稱河中府詠其風景開樽云云釀酒云云避兵云云六月云

云園林云云衝風云云西人用風磨如南方水磨春則懸杵

春月云云每春云云強策云云食飯云云黃橙云云救旱云
云余嘗閱唐會要有壟種羊未之信觀此信有公自注西人
不計閏

西遊錄芭欖城邊皆芭欖園故以名其花如杏而微淡葉如
桃而差小冬季而花夏盛而實有大城曰尋斯干尋斯干者
西人云肥也以地土肥饒故名甚富庶用金銅錢無孔郭環
城數十里皆園林飛渠走泉方池圓沼花木連延誠爲勝概
瓜大者如馬首盛夏無雨以蒲萄釀酒又土多甘蔗取其液
釀酒熬糖又民多羊馬以蜜爲釀

丁亥過沙井和移刺子春韻

行藏俯仰且隨時縕袍懷珠人未知燕雀旣羣難立鶴鳳凰不至擬

元譜終事卷三
胡爲可嗟世態頻更變何奈人生多別離莫忘天山風雪裏湛然駝
背和君詩

湛然居士集自注予昨至沙井乘牛車過前路跨駝方達行
在偶得隔句一聯云牛車馳傳頗異相如駟馬車駝背吟詩
不似竹林七賢畫成有是句

懷親

黃犬不來愁耿耿白雲望斷思依依欲憑鱗羽傳音信海水西流雁
北飛

又

黃沙三萬里白髮一孀親腸斷邊城月徘徊照旅人

雙溪醉隱集趙著序余嘗在貞祐季年親見玉泉大老懷親

詩云云又云云所以見哀思之情極矣又和人云仁義說與
當途人恰似春風射馬耳此見感憤之懷亦已極矣

夢中偶得

庚辰正月夢旃檀剎澄公託萬松老人乞算壽於予予以九
十一莖贈之仍作頌一絕覺而猶憶遂錄之爲他日一笑云
昔年鈎隱索幽奇只向縱橫枝上覓而今拍手笑呵呵九九元來九
十一

湛然居士集仍囑付從者云若澄公道何不云八十一汝但
應云果然果然拂袖便出覺而自著語云幾日昏沈夢中挫
五

劉潤之

元譜綱目卷三
四
抵和林

破帽麻鞋布腿褌強扶衰病且徒行區區不道圖他甚一夜山妻罵到明

湛然居士集潤之館於忘憂門下生徒乘駟渠徒步抵和林城有詩云云予憐而和之述懷有云弟子二三同會食誰曾開口問先生余感而和之

呂鯤

鯤號龍山居士雁門人

案鯤敍雙溪醉隱集在甲辰年時金已亡十年

夏日道中

棗花初落路塵香燕掠麻池乍頡頏一片雲陰遮十頃賣瓜棚下午

陰涼

困學齋雜錄呂龍山與趙虎巖齊名平生多佳句夏日道中
一絕句曲盡田家夏日之趣

耶律鑄

鑄字成仲楚材子官至中書左丞相卒追贈懿寧王諡文忠
有雙溪醉隱集

雙溪醉隱集予嘗有詩碎擘桃花泛酒卮時亦取花散酒醑
遺花者依片數浮以大白

高城曲

城高三百尺枉教人費力賊不從外來當察城中賊

日將出

元詩集卷三
五
陰雲夜合乾坤失萬象不能分別得蒼涼海底浴重光却與行人指
南北

帶將來

野花新傍玉欄開長恨何人向此栽自是王孫不知道牡丹根上帶
將來

擬回文

詩成怨立小橋西晚日春懷傷鳥啼離別書情多寄恨遠山高處暮
雲低

樓上獨來心上愁淚垂難道不腸柔秋深夜雨風迴夢燭剪空窗暗
燄浮

磨劍行

故國江山夢裏行不期今日果長征劍華休遣塵生澁萬事人閒總未平

贈坐竿道士

井序

竿幾五十尺語人曰歲倍之則不數年可得上天矣其謬如此故作詩以懲之因寄長春李真人

說似蓬萊恐更迷劉郎親涉武陵溪梭拋霞綺龍鱗澀輅展虹橋鳳翅齊碁燭縱光然日月宴衣分色剪雲霓桃花零落春風起笑殺王嬙醉似泥

水平橋

洞簫吹罷思無聊却下閒庭弄柳條寂寂小園春晝永一聲啼鳥水平橋

題藍采和圖

終日躑躑舞綠袍有錢繩串戲兒曹
爭如收脚牀頭坐滿眼春風醉
碧桃

山市吟

山閣連城日日新千形萬狀只無人
自分長樂樓臺象不染長安市
井塵

松聲行

水深深山重重前溪後嶺萬蒼松
我來秋雨霽夜宿深山中霜寒千
里龍蛇怒巖谷蕭條嘯貔虎波濤
漾漾生秋寒碧落無雲自飛雨
隴兀兀驚俗聾餘韻飄蕭散碧空
悠然策杖出門去方知萬壑生清
風清歡一夕無今古勾引幽人風
雅句那堪更被山頭月團圓掛在

青松樹

雪後吟

雪助夜寒更漏澀何能盼得到天明乾坤已落義和手休更瓊瑤陌
上行

立秋前一日

大火西流暑氣迴青蠅心緒已徘徊人言明日新消息天外秋風刮
地來

句

人去豪華山好在夢回歌舞水空流翠輦不回天地老白雲飛盡
海山秋蓬萊宮殿遺基在休對西風子細看躊躇搔首無人會
時下樓來卻上樓既解寶藏秦照膽也須珍惜漢吹毛水涵春

色柳涵煙半是人間半是仙 燕南春色老燕北草初肥露冷野花
瘦月明江樹稀 芳草不隨鶯燕老好山依舊水雲深

雙溪醉隱集趙著序雙溪成仲玉泉中令君之子也生長北
溟十三作歌詩下筆便入唐人之閫奧嘗作高城曲日將出
帶將來小胡笳擬回文暮春曲磨劍行春夜吟獨倚門之類
皆十二時作也陰不雨惜花吟琵琶調公子行廣陵散十五
六作也又贈坐竿道士水平橋題藍采和圖早行吟十八九
作也又山市吟暮春對花寄故人題牧牛圖二十一二作也
興寄情趣前人閒有所不到者又九日登瓊花島用呂香山
詩韻留題松聲曲春雪謠蟄龍興雨圖休嗟行路難大傳燕
市自是與燕之士大夫唱酬無虛日又雪後吟立春前一日

曲情之至也又人去豪華各云云

又

金檠夜延螢燭暗翠簾風窄月鉤閒
南漢水乾秋飲馬五城霜重
夜屯兵

雙溪醉隱集呂鯤序如云云此時年十五耳云云又十七時
語也發言便高

耶律季天

季天耶律鑄弟名未詳

句

夢蝶豈知真是蝶騎牛何必更尋牛

雙溪醉隱集李隱卿名谷與青城劉翁同舟至蘭溪卿大夫

修生者館之道侶贈李詩云李郎涉世似虛舟片帆來度楚
江秋又毗陵家弟季天和此篇云云老夫亦慕道者次韻和
之

楊奐

奐字煥然乾州奉天人太宗詔試諸道進士奐試東平兩中
賦論第一官至河南路廉訪使諡文憲有還山集

遺山集君甫勝衣嘗信口唱歌有紫陽閣之語扣之不能答
也未冠夢遊紫陽閣景趣甚異後因以自號初泰和大安閒
入仕者惟舉選爲貴科榮路所在人爭走之程文之外翰墨
雜體悉指爲無用之技尤諱作詩君舉業旣成乃以餘力作
爲詩文下筆卽有可觀在鄆下日中秋燕集一寓士忌君名

諷諸生作詩請君屬和君被酒謂客曰欲觀詩者舉酒欲和
以次唱韻筆不停綴長韻短章終夕成三十九首長安中目
爲鄠郊卽席倡和詩傳之禮部閑閑趙公平章政事蕭國侯
公內翰馮公屏山李公皆折行位與相問遺

試萬甯宮

月澹長楊曉色清大題飛下寂無聲南山霧豹文章在北海雲鵬羽
翼成玉檻玲瓏紅露重金爐縹緲翠煙輕誰言半夜曾前席白日君
王問賈生

元文類楊奐跋趙太常擬試賦稿後當泰和丙寅春三月二
十五日萬甯宮試貢士上躬命賦題曰日合天統侍臣初甚
難之而太常卿北京趙公適充御前讀卷官獨以謂不難卽

元譜終事卷三
日奏賦議乃定既而中選者纔二十有八人僕時甫冠獲試
廷下而席屋偶居前列朝隙聞異香出殿櫺閒一紫衣顧予
起問題之難易及名氏里貫年齒而去少頃復相慶曰適駕
至耳薄暮出宮傳以爲希遇所謂月澹云云者少作也無可
取以紀一時之事云

錄汴梁宮人語十九首

一入深宮裏經今十五年長因批帖子呼到御床前
歲歲逢元夜金蛾鬧簇巾見人心自怯終是女兒身
殿前輪直罷偷去賭金釵怕見黃昏月殷勤上玉階
翠翹珠掘背小殿夜藏鈎驀地羊車至低頭笑不休
內府頒金帛教酬賀節盤兩宮新有旨先與問孤寒

人閒多棗栗不到九重天長被黃衫吏花攤月賜錢
仁聖生辰節君王進玉卮壽棚兼壽表留待北還時
邊奏行臺急東華夜啟封內人催步輦不待景陽鐘
畫燭雙雙引珠簾一一開輦前齊下拜歡飲解寒杯
聖躬香閣內只道下朝遲扶杖嬌無力紅綃貼玉肌
今日天顏喜東朝內宴開外邊農事動詔遣教坊回
駕前雙白鶴日日候朝回自送鑾輿去經今更不來
陡覺文書靜相將立夕陽傷心甯福位無復夜熏香
二后睢陽去潛身泣到明却回誰敢問較似有心情
爲道圍城久妝奩鬪犒軍入春渾斷絕飢苦不堪聞
監國推梁邸初頭靜不知但疑牆外笑人有看宮時

別殿弓刀響倉皇接鄭王尙愁宮正怒含淚強添妝
一向傳宣喚誰知不復還來時舊鍼線記得在窗間
北去遷沙漠誠心畏從行不如當日死頭白若爲生

輟耕錄楊文憲公奐嘗作汴故宮記云云公又有錄汴梁宮
人語五言絕句一十九首雖一時之所寄興亦不無傷感之
意云云

詩藪楊煥然錄大梁宮人語十九絕殊得仲初格調如怕見
云云驀地云云之類

讀通鑑作

風煙慘淡駐三巴漢燼將燃蜀婦髻欲起溫公問書法武侯入寇寇
誰家

輟耕錄霍治書云楊煥然先讀通鑑至論漢魏正閏大不平之遂修漢書駁正其事因作詩云云後攻宋軍回始見通鑑綱目其書乃寢

謁廟

會見春風入杏壇奎文閣上獨凭闌淵源自古尊洙泗祖述何人似孟韓竹簡不隨秦火冷楷林高倚魯城寒漂零蹤跡千年後無分東家寄一簞

山房隨筆楊煥然號關西夫子題孔子廟云云

陶九嫂

勿輕釵與笄勿賤裙與襦柘皋一女子健勝百丈夫家住廬州東庫藏饒金珠天陰夜抹漆暴客萌覬覦胠篋不足較父兄罹剝屠女年

十五六以色竟見驅捕捉星火急亡命洞庭湖既爲陶家婦九嫂從
渠呼寢息風浪中四隣唯菰蒲琴瑟未免合積久產二雛春秋祭享
絕對面伴悲吁向來郎鬢黑漂泊生白須身後乏寸土奈我子母孤
干戈又換世幸在昔塵區何當決歸卒歲容相娛聞語略不疑意
謂癡且愚銳然輕舟攜抱登長塗青氈復舊物水陸多膏腴女兒
拜夫前靈貺焉可誣兒初有祕祝欲答神扶紿郎俟西祠徑往公
府趨畫地訴首尾曾不錙銖官長怒咆哮俄頃就執俘械杻滿蟻
蝨臨街衢使女坐其旁笑頰如施朱自推二請加鑕鉄

官曰產爾腹頗亦憐呱呱女

種不可謂不辜環觀交感泣猛

烈今古無事鬼神畏失機或斯須甘露若訓注反遭圖政類

寶桂孃兒同心實殊

桂孃見杜牧中時

隱忍寂寞濱豈甘盜賊汚白玉投

青泥至寶終莫渝此讎若不雪何以見烏烏一息傳萬口南北通燕
吳夫願女爲婦婦願女爲姑綠林肝膽寒低頭羞穿窬佳人固不幸
能還誰爾拘何事原巨先遂使輕俠徒

原見
涉前
傳漢

自注述蘄春劉益甫所言以爲強暴不道者之戒

句

孤城晴雪底雙塔暮雲閒

詩藪元五言律可摘者楊煥然云云

劉祁

祁字京叔渾源人舉金進士廷試失意歸國初戊戌詔試儒
人祁就試魁西京選充山西東路考試官有神川遜士集
歸潛堂記還鄉里鄉帥高侯爲築室以居因榜其堂曰歸潛

元譜雜事卷三
且以張橫渠東西二銘書諸壁

金史值金末喪亂作歸潛志以紀金事修金史者多採用焉

寄高丞相

青雲自致不須階十稔從容位上台負荷一堂森柱石調和衆口費
鹽梅勤勞密邇三朝重壽考康甯七秩開家道益昌孫有息綵衣扶
杖好歸來

歸潛志高丞相巖夫在相位因元光二年元日慶七十會鄉
里交舊且求作詩文時先子以新罷御史避嫌不赴余方弱
冠爲作詩以公頗負謗且勸其退休也公得詩大喜趣召余
迎謂余曰解道青雲自致不須階耶又撫余背曰汝費字如
何下來蓋余詩云云

贈鮮于伯機

憶昔逢君北渚秋，藕花香裏醉輕舟。
三年一別空回首，千里相思更倚樓。
明月不隨春物老，碧山長帶暮雲愁。
天平松竹黃華水，早晚柴車得共遊。

思君一日如三載，兩寄詩來慰我心。
塵土愈知人世隱，風煙遙見海門深。
貧來笑我常癡坐，亂後憐君更苦吟。
歷下亭前春水闊，扁舟何日重相尋。

困學齋雜錄平生交游贈余詩者多矣，
唯劉京叔二篇嘗吟詠之云云。

句

玄猿哭處江天暮，白雁來時澤國秋。

歸潛志夢中作詩或得句多清邁出塵余先祖龍山君夢得句云山路嶄有壁松風清無塵先子夢中詩云落月浸天池余幼年夢中亦作詩云云如鬼語也

杜仁傑

仁傑字仲梁又字善夫濟南長清人不仕以子貴贈官諡文穆

遺山集麻信之杜仲梁張仲經正大中同隱內鄉山中以作詩爲業予嘗竊評之仲梁詩如偏將軍將突騎利在速戰屈於遲久故不大勝則大敗仲經守有餘而攻戰不足故勝負略相當信之如六國合從利在同盟而敝於不相統一有連雞不俱棲之勢雖人自爲戰而號令無適從故勝負未可知

又仲經有詩云寒客遠峯猶帶雪暖私幽圃已多花仲梁雖有暖散春泉百汭流之句亦自以爲不及也

謝嚴相

高臥東窗興已成簾鉤無復挂冠聲十年恩愛淪肌髓只說嚴家好弟兄

絕句

高燒銀燭照雲鬢沸耳笙歌徹夜闌不念征西人萬里玉關霜重鐵衣寒

山房隨筆杜善甫不屑仕進遊嚴相之門嚴迺濟南望族善甫爲所敬重一日讒者閒之情分浸乖杜謝以詩云云嚴悟款密如初時有掌兵官遠戍於外其妻宴客笙歌終夕善甫

詩云云聞者快之有薦之於朝遂召之表謝不赴中二聯云
俾獻言於乞言之際敢盡其忠若求仕於致仕之年恐無此
理不能爲白居易漫法香山居士之名惟願學陸龜蒙拜賜
江湖散人之號

楊鵬

鵬字飛卿汝海人在金爲詳議官

困學齋雜錄紫羅凡凡道人楊鵬字飛卿一名雲鵬少梁人
北渡後終於東平有陶然集

句

樹古葉黃早僧閒頭白遲

遺山集其死生於詩者汝海楊飛卿一人而已李內翰欽叔

工篇翰而飛卿從之遊初得云云之句大爲欽叔所推激從是遊道日廣而學亦大進客居東平將二十年有詩近二千首所賦青梅瑞蓮餅聲雪意或多至十餘首

楊果

果字正卿祁州蒲陰人金正大初登進士第國初起爲幕官官至參知政事諡文獻有西菴集

元史類編參政李蹊行大司農於許昌果以詩送之蹊大稱賞歸言於朝用爲偃師令

題趙輔之樊川圖

一賦阿房萬古傳而今還有趙樊川謝公墩上王公住異代風流各

自賢

元譜紀事卷三
十五
牧庵集趙樊川集序中舍杜牧名其集爲樊川公居二曲之
閒余少之時屢至焉其地先甚荒棄由爲公有歲新而月盛
之泉石巖洞池塘林木出沒窈窕魁奇繁薈凡可娛心而駭
目者悉甲其鄰人亦目公樊川中統之初京師諸貴詩其圖
者惟楊公西菴爲絕倡云云

案困學齋雜錄第二句作豈知今有趙樊川

趙衍

元史耶律希亮楚材之孫師事北平趙衍

案元文類宋子貞中書令耶律公神道碑稱進士趙衍

七真洞題壁

紛披容與縱笙歌蕙轉光風豔綺羅露濕桃花春不管月明芳草夜

如何璚珠浩蕩隨蘭櫂雲旆低徊射玉珂深入醉鄉休秉燭盡情揮
取魯陽戈

四溟詩話予客京師遊翠巖七真洞讀壁上詩云云耶律丞相門客趙衍所作清麗有味頗類唐調惜乎大元風雅不載故表而出之

案詩亦見雙溪醉隱集題作遊玉泉璚珠作靈珠雲旆作雲錦末注云桃花夫人事見洛陽耆舊傳劉伯壽二侍妾名萱草芳草

徐世隆

世隆字威卿陳州西華人金正大四年登進士第世祖在潛邸召見之官至山東等道按察使有威卿集

元朝名臣事略丞相安圖再相欲得老成人共政奏公雖使之坐而策國事亦尙有賴召之公老病辭不能行附奏便宜九事賜田十頃時八十其秋疾增劇作八十可老歌以自遣

哭文丞相

當今不殺文丞相君義臣忠兩得之義似漢王封齒日忠如蜀將斬顏時乾坤日月華夷見嶺海風霜草木知只恐史官編不盡老夫和淚寫新詩

雪舟謚語文山在獄中時北人有詩云云

七修類稿此作膾炙人口久矣但文山集與輟耕錄作徐世隆史鑑與風化錄作王磐然二人皆元學士無文集可查國史中又不載也

案庶齋老學叢談亦作徐威卿

王磐

磐字文炳廣平永年人登金正大四十年進士第中統元年擢益都等路宣慰副使官至翰林學士承旨諡文忠有鹿菴集

題三陪圖

寺主善爲無米飯病人要喫沒錢鍼皇都詩老多才思收拾酸寒入笑林

困學齋雜錄中朝名士有以木庵陪飯竇太師陪針王狀元陪口作三陪圖徵詩當代名勝爲一矧者鹿庵先生題云云

姜里城文王廟

姜水淺且清姜里餘荒城文王德如日曾此夷其明陝樹憩召伯箕

山栖許生後人起敬愛木石含芳榮嗟爾一坏土耕犁未全平千秋
不磨洗永被囚聖名我行蕩陰道過之爲停征念昔有殷季虐主方
狂醒銛鋒戮賢聖若刈寸草莖左啖鄂侯脯右啜鬼侯羹茲時無姜
里何以紓淫刑姜里深杳杳姜城高亭亭君王在縲紲不異南面聽
淑氣發神慮淳和助心靈演開伏羲畫剖出天地精一時雖冥昧萬
古垂日星若無姜里拘易經何由成易經在所重姜里那可輕

河朔訪古記姜里城文王廟在湯陰縣北六里門榜題曰姜
里城周文王之廟大元至元六年夏十有二日建廟壁龕翰
林承旨永年王磐五言古詩石刻一通云云

題嵇侍中廟

十載家艱恨未消又持手版事昏朝已知定亂功難就猶幸臨危節

可要忠血數斑霑藻火英名千古迫雲霄一杯欲酌祠前土野鶴昂藏未易招

河朔訪古記晉嵇侍中廟墓湯陰縣西南一百二十步曰浣衣里廟有國朝翰林承旨鹿庵王磐律詩一首云云余嘗讀松雪齋集有紀夢嵇侍中曰延祐元年十一月十九日彰德朱長儒道其邦人之意求書晉嵇侍中之廟六字余敬其忠節不辭而書之運筆如飛若有神助是夜京口石民瞻館予書室中夢一丈夫晉人衣冠蓬首玄衣流血被面謂民瞻曰我嵇侍中也今日趙子昂爲余書廟額故來謝之民瞻旣覺猶汗流亦異事也云云

一庵

永清縣志卷三
十七
慶王承旨八秩

人材落落自天成千佛經中第一名已令貳膳常珍入但入朝行以杖行

商左山

句

藥裹封災隨臘去酒杯稱壽逐年新

胡紫山

慶王承旨八秩

堅辭不允老而傳几杖恩光又十年勇折桓文匡弊政力扶周孔上經筵

塞破乾坤享重名玉堂東觀又尊榮香山如礪瀘溝帶才與斯文作

主盟

玉堂嘉話王承旨慶八秩詩一庵云云商左山云云胡紫山云云

李治

治字仁卿號敬齋真定欒城人登金正大末進士第北渡後世祖在潛邸被徵官至翰林學士

元朝名臣事略屏山李先生令代作墓銘數篇一夕而就屏山大加賞異

又四賢堂記遺山敬齋自南都時才名已相埒北渡後嘗往來西州賡唱迭和世亦謂之元李

贈李之和

元牝機關不死根自消自息自氤氲暖於燄燄九微火輕似飄飄三
素雲白玉池心流曉潤紫金爐口裊餘熏未知與道相應否試作新
詩一問君

敬齋古今薈予少小多疾故常求所以攝養之方雖不得升
堂濟馘亦麤得其藩籬臯寓崱山之桐川嘗與李鼎之和論
及於此之和遂於性命者也似有印可意予因贈之以詩云
云

元詩紀事卷四

侯官陳衍緝

郝經

經字伯常澤州陵川人憲宗元年世祖在潛邸召見留王府
官至翰林學士諡文忠有陵川集

帛書詩

霜落風高恣所如歸期回首是春初上林天子援弓繳窮海纍臣有
帛書

宋學士集霜落云云中統十五年九月一日放雁獲者勿殺
國信大使郝經書於眞州忠勇軍營新館右郝文忠公帛書
五十九字博二寸高五寸背有陵川郝氏印方一寸文透於

面可辨識蓋中統元年三月辛卯元世祖登極欲告卽位定和議於宋四月丁未授公翰林侍講學士佩金虎符充國信使以行宋相賈似道拘留儀真不遣至元十一年六月庚申下詔伐宋問執行人之罪時公在儀真已十五載以音問久不通乃於九月甲戌用蠟丸帛書親繫雁足祝之北飛十二月丙辰伯顏南征之師竟渡大江十二月庚午似道懼送公歸國三月虞人始獲雁於汴梁金明池四月公至燕師而七月辛未遂卒年僅五十三爾其書中統十五年卽至元十一年南北隔絕但知建元爲中統也十三年正月宋亡帛書爲安豐教授王時中所得延祐五年春集賢學士郭貫出持淮安使節獲見焉遂奏於朝勅中使取之仁宗詔裝潢成卷翰

林集賢文臣各題識之藏諸東觀或謂世祖見書有四十騎
留江南曾無一人如雁之歎遂興師伐宋皆好事者傳會之
談

梧溪集先是有以雁四十餉公內一雁體質稍異命畜之雁
見公輒張翮引吭而鳴公感悟手書尺帛親繫雁足入雲而
去未幾虞人獲之苑中以所繫帛書託近侍以聞上惻然曰
四十騎留江南曾無一人雁比乎遂進師南伐

緯亢行

歲臨鶉火斗插子穉陽欲復老陰死朱靈南極元龜首望舒北至明
堂裏乾坤翻覆變已窮氣數朝元將有啟旄頭日沒正當中五緯將
且躔蒼龍羣陰已伏衆星沒玄天變白生清風兩角在南大角北龍

頭半妥朝上宮誰知總向亢中聚同舍參差不同度歲鎮熒惑共光明金水煌煌俱不怒東西絡繹似連珠色正芒寒共昭布往年長星掃金源前年孛入紫微垣欒槍妖客不時出天狗枉矢還驚傳今朝太平有此象不久再見成康年昔時曾聞入房駟兆啓金商六百祀同來東井漢元年四百年中稱帝制後來丁卯煥文章二百餘年方季世曾逢丙午當百六今日重逢又重六五星忽來會辰前不知誰禍誰爲福綱紀梁棟兩攝提招搖玄弋動光輝馬祖直欲飲亢池星翁曆史休相欺正是君臣會合時

陵川集附注丙午冬十有一月越十有五曰辛未五星會於亢太陽躔斗十九度太陰經心五度木星躔亢二度八十三分十秒在辰前逆行六日行一度土星躔亢宿一度三分在

辰前順疾十日半行一度金星躔亢一度六十四分四十六秒在辰前順疾一日行一度火星在亢東五度六十二分半在辰前順疾二日行一度水星躔亢三度三十二分三十秒在辰前順疾一日行一度以其五緯皆躔于亢故謂之緯亢云

巴陵女子行

井序

己未秋九月王師渡江大帥拔都及萬戶解成等自鄂渚以一軍覘上流遂圍岳岳潰入於洞庭俘其遺民以歸節婦巴陵女子韓希孟誓不辱於兵書詩衣帛以見意赴江以死其詩悲婉激切辭意壯烈有古義士未到者今并其詩錄於左方嗚呼宋有天下文治三百年其德澤龐厚膏於肌膚藏於

骨髓民知以義爲守不爲偷生一時計其培植也厚故其持
藉也堅乃知以義爲國者人必以義歸之故希孟一女子而
義烈如是彼振纓束髮曳裾峨冠名曰丈夫而誦書學道以
天下自任一旦臨死生之際操履云爲必大有以異於希孟
矣余旣高希孟之節且悲其志作巴陵女子行以申其志云
北來諸軍飛渡江突騎一夜滿岳陽樓頭火起入閭巷曹逃偶走如
牛羊巴陵女子尙書婦生平不識門前路亂兵驅出勢倉皇夫壻翁
姑在何處吞聲掩淚行且嘸嘸痕沾溼越羅衣此身忍使人再辱裂
帛暗寫臨終詩上言社稷安危事下說投江誓天志一回宛轉一悲
辛心折魂飛不成字詩成淚盡赴江流蛾眉蕭颯天爲愁芙蓉零亂
入秋水玉骨直葬青海頭古來烈婦纔一二誰似巴陵更文理名與

長江萬里流丞相魏公還不死

元詩
體要

陵川集附注巴陵女子韓希孟魏公五世孫嫁與賈尙書男
瓊爲婦岳州破被虜之明日以衣帛書詩願好事君子相傳
知吾宋家有守節者其詩云宋未有天下堅正臣禮秉開國
百戰功每陳唯雄整及其侍幼主臣心常炯炯帝曰卿北伐
山戎今有警死狗莫擊尾此行當繫頸卽日陞辭行盡敵心
欲逞陳橋兵忽變不得守箕顓禪讓法堯舜民亦普安靜有
國三百年仁義道馳騁未改祖宗法天何賜太眚細思天地
理中有幸不幸天果喪中原大似裂冠衽君誠不獨活臣實
無魏邴夫人與得人垂誠常耿耿江南無謝安漠北有王猛
所以戎馬來飛渡巴陵境大江限南北今此一舴艋本期固

封守誰知如畫餅烈火燎崑岡不辨金與礦妾本良家子性
僻守孤梗嫁與尙書兒含香署蘭省直以才德合不棄宿瘤
癭初結合歡帶誓比日月晒鴛鴦會雙飛比目願長並豈期
金石節化作桑榆景旄頭勢正然蚩尤氣先屏不意風馬牛
復此逸鄢郢一方遭刼虜六族死俄頃退鷁落迅風孤鸞弔
空影簪堅折白玉瓶沈斷青綆死路定冥冥憂心常炳炳妾
心堅不移改邑不改井我本瑚璉器安肯作溺皿志節能轉
石氣噓如吞鯁不作燭火然願爲死灰冷舍生念麴蛾乞憐
羞虎弄借此清江水葬我全首領皇天如有知定許血面請
願魂化精衛填海使成嶺

武昌詞三首

井序

王師圍鄂遊騎於金牛鎮得一婦人欲侵之厲聲曰我夫壻
翁姑皆死目前未卽死又可受辱邪速與我死遂置之自稱
梅溪主人張素英作歌詩數篇以見志尋以疾卒於湖中得
一路分妻一日以無夫選賜有功軍人卽以掌批其頰對今
上大呼曰妾夫將千五百人扼敵沅州妾命婦也豈可辱於
是乞速賜死上矜其志賜之衣糧使有司存恤之以俟其夫
亦尋以疾卒又有漢陽教授之妻爲一兵所掠義不受辱投
於沙湖三人者僕親見之皆可附希孟之義各爲賦詞以寓
意云

巴陵女子韓希孟梅溪主人張素英解作歌詩還死節不論傾國與
傾城

烏鬼山頭鬧鼓聲武昌恭人攜孺兒黃鬚回鵲便批頰義感萬乘真
英奇

漢陽宣教是妾夫妻身未死緣事姑騎士朝來強擁去抱石半夜投

沙湖

陸川集

青城行

壞山壓城殺氣黑一夜京城忽流血弓刀合沓滿掖庭妃主喧呼總
狼籍驅出宮門不敢哭血淚滿面無人色戴樓門外是青城匍匐赴
死誰敢停百年涵育儘塗地死霧不散昏青冥英府親賢端可憐白
首隨例亦就刑最苦愛王家兩族二十餘年不曾出朝朝點數到堂
前每向官司求米肉男哥女妹自夫婦覩面相看冤更酷一旦開門
見天日推入行閒便誅戮當時築城爲郊祀却與皇家作東市天興

初年靖康末國破家亡酷相似君取他人既如此今朝亦是尋常事
君不見二百萬家族盡赤八十里城皆瓦礫白骨更比青城多遺民
獨向王孫泣禍本骨肉相殘賊大臣蔽君尤壅塞至今行人不歎承
天門行人但嗟豪利宅城荒國滅猶有十仞牆牆頭密匝生鐵棘

元詩選陵川集詩叙金亡事最詳又有金源十節士歌序金
源氏播遷以來至於國亡得節義之士王剛忠公等十人皆
死事死國有古烈士之風可以興起末俗振作貪懦其名字
官階始終行業自有良史其大節之嶽嶽磊磊在人耳目雖
耕夫販婦牛童馬走共能稱道者作歌以歌之庶幾揄揚激
烈由其音節見其風采云天興諸臣國亡無史不能具官故
皆祇以當世所稱者如郭蝦蟇仲德行院等書之俟國史之

出當爲釐正云十節士謂王子明移刺都郭蝦蟆合答平章
陳和尚馬烏古孫道原仲德行院絳山奉御李豐亭李伯淵
也

許衡

衡字仲平河內人世祖出王秦中徵授京兆提學官至集賢
大學士兼國子祭酒諡文正學者稱魯齋先生有魯齋集
西軒客談許魯齋仕元世祖朝以哈麻短毀漢法不得行其
學力求歸田觀其與人書有春日池塘云云

許魯齋集若夫春日池塘秋風禾黍夏耒雨蠶老麥收冬將
寒困盈箱積門喧童稚架滿詩書山色水光詩懷酒興是以
心思意向日日在此言亦此書亦此百周千折必期得此而

後已

元朝名臣事略先生疾甚曳杖於門曰予心怵怵然瞑目坐久之歌朱子睡起床風瑟瑟覺來山月團團身心無累久輕安况有清涼池館小詞歌罷奄然而逝

辭召命作

一天雷雨誠堪畏千載風雲漫企思留取閒身臥田舍靜看蝴蝶挂

蛛絲

必

山房隨筆許仲平學問文藝爲世所尊稱爲夫子有辭召命詩云云可以觀其志矣

崔斌

斌字仲文馬邑人世祖在潛邸召見應對稱旨官至江淮行

元言緒事卷四
省左丞爲阿合馬所害追諡忠毅

弔李肯齋

一夕司空撫御床祖龍未死國先亡只緣西楚無堅壁致使南州總
戰場湘水一川骸骨滿肯齋千古姓名香我來不見先生面猶對西
風酌一觴

隱居通議相士葉秋月誦北人崔參政弔潭帥李肯齋詩云
云

庶齋老學叢談左丞崔公仲文斌弘州人資兼文武重道崇
儒統兵平湖湘時潭帥李肯齋芾城將破舉家自刑繼之以
火忠義大節天下咸知公弔以詩云云

案叢談缺第三句據通議補

金山

浩浩長江天際來中流砥柱獨崔巍
風搖萬壑秋聲動潮捲千堆雪浪迴
山勢參差現靈鷲海波遼闊隔蓬萊
夕陽不盡登臨意倒瀉滄溟入酒盃

庶齋老學叢談左丞崔公仲文題金山詩云云

高鳴

鳴字雄飛岢嵐人元初官至吏部尙書

獨石

一塊蒼頑石頽然半水濱可憐闔立本徒寫五湖真

題杜莘老華山圖

上方可望不可到今日興來時臥游須信丹青有神化世間隨處是

同州

困學齋雜錄高雄飛獨石詩云云題杜莘老華山圖云云

石國英

國英號月澗宿州靈壁縣人元初官至福建宣慰

雁蕩能仁寺遺詩

我行天下山水半側身西望長嗟嘆山到蜀川方絕奇世殊久被微
官絆萬里提兵雁蕩來高牙一展嵐霧開松風吹騎聯鑣入高日下
照繙經臺老僧振錫去何所香篝寂寂佛無語山鳴谷應應者誰似
有秦民宅幽阻姑休爾旅枕爾鋌雲深不得驚龍眠水晶一派瀉琤
玉歲與清氣中洄沿二三溪確長林下人力罷春天所借草香花淨
太古春虎嘯猿吟明月夜幽尋靜勝登嵯峨鸞旗柱筆光影摩詩成

寫破峭壁翠稽首巖前諾巨那

梧溪集題石安撫雁蕩能仁寺遺詩後公會孫宣武將軍松
江萬戶瓊嘗乘遽道經寺得是詩於老僧今年春訪予風雨
下因出卷誦之殆見公存心仁律下嚴悠然雅歌而神采炳
如也

張弘範

弘範字仲疇河內人蔡國公柔第九子中統初授行軍司馬
官至蒙古漢軍都元帥薨諡文略贈太師至大閒改諡忠武
延祐六年加封淮陽王諡獻武

讀韓信傳

一怒燕齊楚趙收將軍今古果誰儔後來肯爲陳豨計先日何辭蒯

徹謀自是多能慙噲等何能輕舉學留侯可憐一片肝腸鐵却使終
遺萬古羞

讀李廣傳

弧矢威盈塞北屯漢家飛將氣如神但教千古英名在不得封侯也
快人

淮陽集許從宣序王以事業之餘適其情性而聊以見之吟
詠雅韻清辭雍容諧協固非服介冑者所及至其讀韓信李
廣傳諸作英氣偉論卓犖發揚又豈區區律度之所能道哉

王惲

惲字仲謀衛州汲縣人中統元年由詳議官授中書省詳定
官官至翰林學士諡文定有秋澗集

玉堂卽事

陰陰槐幄幕閒庭靜似藍田縣事廳細草近緣春雨過映階侵戶一時青

日長上直玉堂廬思入閒雲待卷舒重爲明時難再遇等閑羞老蠹魚書

玉堂嘉話宋相李昉春日玉堂卽事有云一院有花春晝永四方無事簡書稀予夏日玉堂卽事亦有二絕句云云

口號

隔夜端門分板位平明簪笏列鴛行紫雲低覆千官入潤作金爐百和香

玉堂嘉話至元十五年戊寅正月甲寅乙酉朔同李侍講德

新應奉李謙陪百官就位望拜行在所凡七拜其侍儀司先
一日於端門兩闕間灰界方所以板書百官號隨各司依品
秩作等列班定以次入宮行禮禮畢由左掖門出風埃大作
所謂出門塵漲如黃霧始覺身從天上歸曾有口號云云

李夫人畫蘭歌

爲郎中孫
榮甫賦

清閼堂深不知暑瑤草佳期夢玄圃孫郎笑折紫蘭來素影盈盈映
修渚李夫人澹丰容天然與蘭相始終剡藤一筆作九畹落墨不減
江南工芳姿元與凡卉異曄曄况是湘纍藁離騷不復作遺恨千古
沈幽宮君看此花有深意似寫靈均幽思悲回風君家大雅堂文彩
東野翁併入慘澹經營中秋風拂簾秋日長芳霏霏兮汜崇光淡妝
相對有餘韻畫欄桂子空秋香淡軒託物明孤潔五十年來抱霜節

固知色相皆空寂妙得於心聊自適仿像湘娥倚暮花黃陵廟前江
水碧生平佩服真賞音升聞紫庭非素心喚起謫仙搖醉筆爲翻新
曲瀉瑤琴

秋澗集右夫人名至規號澹軒亡宋狀元黃朴之女長適尙
書李珣子早寡今年七十有二善畫蘭撫琴近爲郎中孫榮
父作九畹圖若與蘭爲知聞也且自敘其後云予家雙井公
以蘭比君子父東塾翁甚愛之予亦愛之每女紅之暇嘗寫
其真聊以備閨房之玩初非以此而求聞於人也郎中以蘭
省之彥一日來徵予筆遂誦點污亦何忍但覺難爲辭之詩
以應之孫求歌詩於予因樂爲賦此者正取其節而不以其
藝故也秋七月初吉秋澗老人題

張之翰

之翰字周卿邯鄲人中統初任洛磁知事官至松江府知府

檢荒租二首

頭田亂插白紅牌翁媼相看不敢猜十八年愁今日散愛民使者檢
荒來

三載徒勞三載過旁人休笑拙催科浙西儘有荒閑地不似松江分
外多

松江府志之翰當知府事行視荒租遂有斯作後租獲免民
懷之書石以介上海縣庠壁至今比甘棠之愛

鏡中燈

孤影徘徊入照臨西風不動竟沈沈一池沿水

一作承

鎔

一作藏

真火半夜金

星犯太陰鷄翅舞

一作拍

時紅焰歇

一作息

蛾頭撲

一作觸

處碧光深縱渠百鍊千

燒後依舊剛明一片心

元詩癸集嘗作鏡燈詩膾炙人口時呼爲張鏡燈典郡日自
題府治春帖云官清瑩澈三江水民樂和熏兩縣春或曰如
何不見府明年詔罷府立庸田司

梁曾

曾字貢父燕人中統四年薦辟中書左三部令史官至集賢
侍講學士

悼鮮于伯幾鶴

翠柏屏前竹闌曲幾見毵毵雪衣舞平生風雲萬里心零落湖山一
邱土世間萬事不可虞奇禍何由也到渠不見嵇康遭殺戮令人空

元詩紀事卷四
十一
歎養生書

西湖志餘伯幾有鶴死非命瘞之西湖士夫多有詩悼之梁曾詩云云

徐琬

琬字子方號容齋又自號汶叟東平人至元初薦爲陝西行省郎中官至翰林學士承旨諡文獻

題萊州海神廟

龍宮高拱六鼇頭六合乾坤日夜浮貝殿走珠蛟構室戟門烘霧蜃噴樓中原右顧眞孤島外域東漸更九州咫尺琛航倭濊近好將風浪戒陽侯

庶齋老學叢談中丞容齋徐公人物偉岸襟度寬洪文學吏

才筆不停思題萊州海神廟云云通之狼山僧舍有墨蓮公
肆筆成長篇尤工緻建臺揚州日確齋荀公雪樓程公校官
胡石塘倡和無虛日亦一時之文會也

句

一竅鬼工開混沌八蠶神繭墮扶桑

玉堂嘉話徐子方繭瓶詩云云

姚燧

燧字端甫柳城人後遷洛陽文獻公樞之姪至元八年爲秦
王府文學官至翰林學士承旨諡曰文有牧菴集

題圍肚詩

八十年來遇此春此春遇後更無春縱然不得扶持力也作墳前拜

掃人

草木子牧菴學士致政於家年八十時夏日沐浴有待妾在側因私焉公起妾前拜曰主公年老賤妾倘有娠家人必見疑願賜識驗公因捉其圍肚題詩於上云云公薨後妾果有子家人疑其外通妾出詩遂解

案至正直記亦載此事謂係宋末一老儒語尤猥瑣今不取
贈相師

淵澄如止水泉活有餘波梅到清香處君應風味多

至正集牧庵姚先生贈相師梅淵泉詩云云商得符旣爲畫之且求予詩云

盧摯

摯字處道一字莘老號疎齋涿郡人至元五年進士官至翰林學士承旨

題夷齊采薇

服藥求長年孰與孤竹子一食西山薇萬古猶不死

詩藪虞伯生題宣和雪竹洒墨寫琅玕深宮春晝間蕭條數枝雪不似紇干山盧處道題夷齊采薇云云雖語意新警然已落議論關

閻復

復字子靜其先平陽和州人徙居高唐至元八年薦爲翰林應奉官至翰林學士承旨諡文康有靜軒集

元史扈駕上京賦應制詩二篇寓規諷意世祖顧和禮霍孫

言部事卷四
十四
曰有才如此何可不用

梅枝拄杖

斫取江南萬玉柯
春風入手慣摩挲
較清邛竹能香否
鬪品鳩籐奈俗何
聲破夢寒霜滿戶
影隨詩瘦月橫坡
人言功在調羹上
不道扶持力更多

吳禮部詩話閻子靜初挾其鄉人書如京謁賈仲明以梅枝拄杖爲獻適姚公茂諸人至賈因見閻道其故諸公令賦梅杖詩閻因賦云云諸公延譽遂知名

句

羣材方用楚一士獨辭燕

危素纂吳文正公年譜程公疏上所薦士以復命終不忍舍

公公力以母老辭遂治任南歸公卿大夫多中原老成而宋之遺士亦有留燕者皆知公之不可留而惜其去賦詩送別
閻文康公復之詩云云

伯顏

伯顏蒙古巴林部人至元十一年拜中書左丞相總兵伐宋官至開府儀同三司薨贈太師封淮安王諡忠武

玉堂嘉話初宋未下時江南謠云江南若破白雁來過當時莫喻其意及宋亡蓋知指丞相巴延也

過梅嶺岡留題

馬首經從庾嶺回王師到處悉平夷擔頭不帶江南物只插梅花一兩枝

七修類藁伯顏下江南過金陵梅嶺岡詩云云所以著名亦有是善

王思廉

思廉字仲常真定獲鹿人至元十年世祖召見官至翰林學士承旨諡文恭

壽陽梅圖

一聲白雁渡江潮便覺金陵王氣銷畫史不知亡國恨猶將鉛粉記前朝

西湖志餘錢選字舜舉宋末時人入元以工畫花鳥名江南王思廉題其壽陽梅圖云云

王宥

宥字 東平人官中書省郎中

歸婦吟

烈火都將玉石焚
死生契闊憶中分
信音一絕思青鳥
望眼雙穿見白雲
殘日鵲鴿還有難
北風鴻雁正離羣
新詩送爾還家去
重續當年織錦紋

山房隨筆北方王郎中宥有歸婦吟其序曰天馬浮江兵強將銳所征無敵所掠無遺俘戮之民奚啻億萬然生死存亡悲歡聚散豈無數存乎其間夫劉氏者吉之永豐人也問其父母兄弟舅姑夫與子皆在焉夫我不知則已既知之何獨不令其歸甯於父母乎嗚呼不幸之幸莫大於斯故不可無一言以送之案亦詳輟耕錄

信世昌

世昌字雲甫東平人官至翰林學士承旨

樂府

東風吹落花紛紛辭故枝莫怨東風惡花有再開時

句

宗廟有靈賢相出黔黎無患太皇明

歸田詩話信雲父山東人元兵南下爲張宏範元帥館客文山被獲宏範命雲父款待之日侍談論頗有向南之意贈文山詩宗廟云文山因教以詩法卽領悟作樂府云文山稱賞

陳伯通

伯通字 雲中人

海青馬生肝

金符飛下渥洼龍鞭影輕搏六翮風耳竅風聲聞鬪蟻眼花雲影疾
驚鴻未容駿骨遼東老已得英名冀北空一縷紅塵江漢捷天庭不
爲荔支紅

催薦廚中語未闌控拳豪客簇雕鞍翠翻雲葉并刀亂冰透霜花楚
玉寒一吮味甘牙齒滑十分香徹鼻頭酸夢魂不到鱸魚膾醉眼江
湖特地寬

驚呼乳盜意匆匆便覺餘香鼻觀通露滴冰盤藍玉軟風生霜刃碧
囊空舞娃驚濺羅衣綠酒客潛消醉臉紅若使昔人知此意羊頭爛
熟不成功

句

肢傷一體婁師德目眇三分李雁門

庶齋老學叢談陳伯通宣慰雲中人跛而眇自述云云有海
青馬生肝詩云云

李庭

庭字顯卿

咸陽懷古

連雞勢盡霸圖新兀兀宮牆壓渭濱指鹿只能欺二世沐猴那解定
三秦倚天樓觀餘焦土落日河山幾戰塵今古悠悠同一轍不須作
賦弔前人

庶齋老學叢談安西府諮議寓菴李顯卿庭咸陽懷古云云

語意格筆俱妙有唐體

耶律柳溪

柳溪名未詳楚材孫

剪子

體出并州性自剛
篋中依約冷光芒
雙環對曲蜂腰細
疊刃齊開燕尾張
慣愛分花沾雨露
偏憎裁錦破鴛鴦
可憐戍婦寒窗下
一剪邊衣一斷腸

庶齋老學叢談宣慰耶律柳溪詠剪子詩云云

句

角端呈瑞移御營
搃亢問罪西域平

庶齋老學叢談耶律柳溪詩集云云注云角端日行萬八千

元詩紀事卷四
里能言曉四夷之音昔我聖祖皇帝出師問罪西域辛巳歲
夏駐蹕鐵門關先祖中書令奏云五月二十日晚近侍人登
山見異獸二目如炬鱗身五色頂有一角能人言此角端也
當於見所備禮祭之此天降神物預言吉徵也

員炎

炎字善卿衛州人卒年六十七秋澗集有員先生傳

洛陽懷古分韻得髮字

東洛打空城北邨連廢闕懷古動悲吟遠客生華髮

隆德宮

林花細妥胭脂色水荇輕淤翡翠泥歌舞留連嫌晝短樓臺縹緲覺

天低

讌集東平湖亭

北海尊前人似玉東原城下水如天滿眼荷花三百頃采蓮人語隔
秋烟

高唐道中

影孤海內干戈滿愁入天涯草樹低桑柘影空蠶已老陂塘涸盡燕
無泥

扇尾羊

馮翊春草香芊綿柔毛食飽飲苦泉臥沙稀肋瓊筋細帶霜小耳春
繭圓扇尾一方移種類風頭萬里搖腥羶吾生本無食肉相不煩浼
手愁烹煎

馬酮

漫說千杯不醉人清光壓倒洞庭春攜行可用紫絲絡渴飲不煩烏
角巾搖動革囊成醞釀封藏花盃作逡巡坐中一混華夷俗或有豪
吞似伯倫

句

宿雨乍收雲葉斷猶疑電影掣湖心

濟南金線泉宿雨

秋澗集故人楊奐主漕洛師愍其窶用監嵩州酒時兵後邑
居榛荒日與鹿豕伍而隨所徵上謁奐方據案坐堂上吏鳧
雁行立炎挂布囊掖下杖巨梃直前曰楊使君不相知置我
於此幾爲老羆所噬吾不能爲汝再辱遂揖而去自是長遊
河朔以詩鳴諸公間其洛陽懷古各云濟南金線泉宿雨云
云扇尾羊各云云予時能憶者止此

橄牟

一作橄舉

橄牟字彥舉陝人有函谷道人集

案元遺山有爲橄子釀金詩云秋來聞說酒杯疎却爲窮愁
解著書與困學齋雜錄合惟橄字又作橄

無題

誰家金鴨暖梅魂繡戶春風半掩門桃葉等閒留暮雨梨花寂寞過
黃昏盤盤鸞髻堆雲影澹澹蛾眉掃月痕常似謝家銀燭底鳳凰釵
影落瑤尊

記夢

千里崤函楚客行關河西上鐵牛城申湖亭下月初上召伯堂前草
自生十里杏園紅雨暗一條春水碧羅平覺來半壁寒燈底吹落風

簷暮雨聲

過沙井

沙沈石馬廢城秋
劍鉞寒生古戍樓
平日只疑無蜀道
此行何處問荆州
山連海塞從西斷
水界龍荒盡北流
一曲商歌才夜半
朔風吹雪望牛頭

遊香山

石棧天梯落日紅
誰開青壁削芙蓉
捫參歷井來何暮
佩玉鳴鑾更不逢
僧去古潭雲渡水
鶴陰清露月平松
世間骨相誰潘閔
誤打金陵半夜鐘

送郭祐之

南口青山北口雲
天涯何地又逢君
陌頭楊柳西行馬
畫角三聲不

忍聞

困學齋雜錄詩人撒舉性嗜酒工於詩客京師十餘年竟流
落而死今得逸詩數篇信手錄之云云

句

氣凌太華五千仞詩繞國風三百篇

贈王秋澗

秋澗集橄𣎵字彥舉少爲里嗇夫初不解文字一日忽能作
詩吐奇怪語嘗贈詩云云

鄭雲表

句

形如槁木因詩苦眉鎖蒼山得酒開

困學齋雜錄撒舉同時有鄭雲表者慕彥舉之爲人作詩挽

之云云人以爲寫真云

元詩紀事卷五

侯官陳衍緝

劉因

因字夢吉保定容城人初名駟字夢驥表所居曰靜修至元十九年徵拜右贊善大夫二十八年召爲集賢學士固辭不起諡文靖

滋溪文橐獨好長嘯嘗遊西山當秋風木落時作一曲而感慨係之王師伐宋先生作渡江賦以哀之嘗愛諸葛孔明靜以脩身之語表所居曰靜脩閒遊郎山號雷溪真隱

林泉隨筆劉靜修詩古選不減陶柳其歌行律詩直遡盛唐其爲文章如田孝子碑輞川圖記等作皆正大光明

讀史

紀錄紛紛已失真語言輕重在詞臣若將字字論心術恐有無邊受屈人

薛文清公集道盡作史之弊

詠曾點

獨向舞雩風下來心齋門外欲生苔歸時過著顏家巷說與城南花正開

庶齋老學叢談靜修集讀史詩云云殊非確論修史自有定例謂如其人功十而過一本傳不書其過十功豈不能贖一過其過必於他傳見之其人過十而功一傳必書其功謂其人豈無一善可書或有當書之事本傳不載者必於他傳見

之其例甚多未易縷陳又詠曾點云云此猶非也坐忘乃莊子之說借孔顏之名以形容道妙非孔門實事以此求顏子則誤矣未可以私意立說輕於訾毀聖賢况顏子與聖人僅隔一壁城南之花豈足動其心語意大欠持擇

書事三首

當年一線魏瓠穿直到橫流破國年
草滿金陵誰種下天津橋上聽啼鵲

升庵詩話補遺劉文靖公因書事絕句云云宋子虛詠王安石亦云投老歸耕白下田青苗猶未罷民錢半山春色多桃李無奈花飛怨杜鵑二詩皆言宋祚之亡由於安石而含蓄不露可謂詩史矣

臥榻而今又屬誰江南回首見旌旗路人遙指降王道好似周家七
歲兒

南濠詩話劉靜修書事詩云云周公謹雜識載北客詩憶昔
陳橋云云二詩皆爲宋太祖作者若出一機軸而辭意嚴正
可謂詩之斧鉞矣

馮道

亡國降臣固位難癡頑老子幾朝官朝梁暮晉渾閒事更捨殘骸與
契丹

筆精馮道歷事四朝後世羞之歐公作史謂無廉恥史斷諸
賢紛紛訾議不如元劉靜修一絕約而盡也云云

宋理宗南樓風月橫披二首

元音作煙
波橫披圖

試聽陰山勅勒歌朔風悲壯動山河南樓煙月無多景緩步微吟奈爾何

物理興衰不可常每從氣運見文章誰知萬古中天月只辦南樓一夜涼

元音太祖嘗詠月云才到中天萬國明理宗和云併在南樓一夜涼步故以寓其意云

西湖志餘理宗嘗畫南樓風月橫披有併作南樓之句靜修題詩云云蓋才到中天宋太祖月詩也

白雁行

北風初起易水寒北風再起吹江干北風三吹白雁來寒氣直薄朱崖山乾坤噫氣三百年一風掃地無留殘萬里江湖想瀟灑佇看春

水雁來還

西湖志餘先是臨安有謠云江南若破白雁來過蓋伯顏之識也劉靜修白雁云云蓋寓言也

登鎮州隆興寺閣

大行鱗甲搖晴空層樓一夕蟠白虹天光物色驚改觀少微今在青雲中初疑平地立梯磴清風西北天門通又疑三山浮海至載我欲去扶桑東霎華寶樹忽當眼拍肩愛此金仙翁金仙一夢一千載騰擲變化天無功萬象繞口恣噴吐坐令四海皆盲聾千池萬沼盡明月長天一碧無遺蹤我生玄感非象識此眼此臂將安庸海岳神光埋禹鼎人閒詭態何由窮金天月窟爾鄉國玉毫萬丈須彌峰一杯徑欲呼與語爲我返駕隨西風堂堂全趙思一豁江山落落吾心胸

中原左界此重鎮形勢彷彿餘兵衝歌舞遺臺土花碧旗幟西山霜
葉紅乾坤割裂萬萬古烏鳶螻蟻爲誰雄渟水悠悠自東注落日渺
渺明孤鴻

詩藪劉夢吉古選學陶冲淡有句無篇歌行學杜隆興寺明
遠堂等作老筆縱橫雖閒涉宋人然不露儒生腳色

金太子允恭墨竹

黑龍江頭氣鬱蔥武元射龍江水中江聲怒號久不瀉破墨揮灑餘
神功天人與竹皆眞龍墨竹以來凡馬空人間只有墨君堂何曾夢
到瓊華宮瑤光樓前月如練倒影自觀河山雄金源大定始全盛時
以漢文當世宗興陵爲父明昌子樂事孰與東宮同文采不隨焦土
盡風節直與幽蘭崇百年圖籍有蕭相一代英雄誰蔡公策書紛紛

少顏色空山夜哭遺山翁我亦飄零感白髮哀歌對此吟雙蓬秋聲
蕭蕭來晚風極目海角天無窮

靜修集自注黑龍江見金史幽蘭軒義宗死所汴亡張蔡公
以金寶錄歸遺山嘗就公謄錄此軸亦公得於汴之中祕者
公之子仲仁持以求予詩故終篇及之

方回

回字萬里號虛谷徽州歙縣人宋景定壬戌別省登第知嚴
州元兵至迎降卽以爲建德路總管尋罷有桐江集

秋晚雜書十首

錄二

堂堂陳去非中興以詩鳴曾呂兩從橐殘月配長庚尤蕭范陸楊復
振乾淳聲爾後頓寂寥草蟲何薨薨永嘉有四靈詞工格乃平上饒

有二泉旨淡骨獨清學子孰取舍吾非私重輕極玄雖有集豈得如淵明

竊嘗評少陵便生太宗時豈獨魏鄭公論諫垂至茲天寶得一官主昏事已危脫命走在所窮老拜拾遺卒坐鯁直去漂落西南陲處處苦戰鬪言言悲亂離其閒至痛者莫若八哀詩我無此筆力懷抱頗似之

人言太白豪其詩麗以富樂府信皆爾一掃梁隋腐餘編細讀之要自有樸處最於贈答篇肺腑露情愫何至昌谷生一一雕麗句亦焉用玉溪纂組失天趣沈宋非不工子昂獨高步畫肉不畫骨乃以帝閑故

六經天日月諸子如四時史自班以上語奇文亦奇踵武蔚宗輩語

有文無之小宋刊新唐不悟宵寐規以藝傳李杜待之無乃卑他人
有遺集一覽不再窺惟此與韓柳咀嚼無厭期儕彼楓落生吾欲鐫
此疵

道自漢魏降裂爲文與詩工詩或拙文文高詩或卑香甌假山序不
妨自一奇鮐橘多骨核乃至肆詆訾恭維陳無已此事獨兼之五七
掩杜集千百臻秦碑四海紫陽翁歸美豈其私所以此虛叟取爲晚
節師

世稱陶謝詩陶豈謝可比池草故未凋階藥已頗綺如唐號元白白
豈元可擬中有不同處要與分朴詭鄭圃趙昌父潁川韓仲止二泉
豈不高顧必四靈美鹹潮生薑門螯蜺以爲旨未若玉山雪空鐙煮
荒薺

隱居通議方紫陽序羅壽可詩曰詩學晚唐不自四靈始宋
劉五代舊習詩有白體崑體晚唐體白體如李文正徐常侍
昆仲王元之王漢謀崑體則有楊劉西崑集傳世二宋張乖
崖錢僖公丁厓州皆是晚唐體則九僧最逼真寇萊公魯三
交林和靖和仲先父子潘逍遙趙清獻之徒凡數十家歐公
出焉一變爲李太白韓昌黎之詩蘇子美二難相爲頡頏梅
聖俞則唐體之出類者也蘇長公踵歐公而起王半山備衆
體精絕句五言或三謝獨黃雙井專爲少陵秦晁莫窺其藩
張文潛自然有唐風別成一宗惟呂居仁克肖陳后山棄所
學學雙井黃致廣大陳極精微天下詩人北面矣立爲江西
派之說銓取或不盡然陳簡齋曾文清爲渡江之巨擘乾淳

元詩紀事卷五
六
以來尤范楊陸蕭其尤也高古清勁盡掃餘子又有一朱文
公嘉定而降稍厭西江永嘉四靈復爲九僧晚唐體日淺日
下然尙有餘杭二趙上饒二泉典型未泯今學詩者不於三
千年閒上溯下沿窮探邃索往往追逐近世六七十年閒之
所偏向非區區之所敢知也

雨夜雪意

洶湧風如戰蕭騷雨欲殘遙峯應有雪半夜不勝寒吾道孤燈在人
寰幾枕安何當眩銀海清曉倚樓看

瀛奎律髓予丁丑之冬在桐江賦雨夜雪意云云魯齋趙君
與東字賓暘和予此詩哦詩字欲安佳句也尾句亦活動勝
予所倡

初夏書事

平生萬事鳥飛空
綠鬢蒼顏俛仰中
醉若山頽無舊侶
坐如泥塑有新功
詩成不覺窗移日
心定何煩扇引風
結網小蛛恣來往
忘機應亦識衰翁

新安文獻志賢良阮公秀實亟取此詩

久雨

元胡不出積雨予
尼意彌八紘膝此一席誰具烝徒假予楫航一往
滄海觀彼茫洋掩關晝眠胡寧不暇魯叟攸戒敢視不夜寂寂疎簾
幽幽空階鳥下啐蘚傷予之懷悠悠古道溢溢行潦豈無岑樓送目
遙草心之憂矣莫或予知彼其之子謂予寒饑

新安文獻志陳定宇批云陶體

元詩集卷五
舟行青溪道中入歙三首

夜寒如覺有猿吟積翠重蒼萬壑深下水輕舟弦脫箭盤山細路線
穿針

刺桐花發草如藍欲卸綿袍翦紵衫一夜春霜忽如雪江南天氣不
宜蠶

蕨拳欲動茗抽芽節近清明路近家五日緩行三百里夾溪隨處有
桃花

桐江集睦州青溪本歙州歙縣之東鄉吾遠祖東漢賢良方
公儲墓在焉泝流而上湍石奇怪沈約所謂新安江水至清
是也睦改爲嚴州歙州改爲徽州青溪縣改爲淳安縣而歙
縣獨存漢時舊名

聽航船歌十首 錄二

南到杭州北楚州三江八堰水通流
牽板船篙爲飯碗不能辛苦把鋤頭

桐江集自注舊航船不過揚子江
今直至淮河三江者錢塘江吳淞江
揚子江八堰者杭州蕭公閘北關堰
常州犇牛堰呂城堰潤州海鮮河堰
揚州瓜州閘而召伯堰小不與其一
楚州北神鎮堰

南姚村打北姚村鬼哭誰憐枉死魂
爭似梢工留口喫秀州城外鴨餛飩

桐江集自注秀之南門至海鹽縣古塘
八十里人人帶刀讎劫十二年間私殺
官誅骸骨如丘

春半久雨走筆二首

萬事心空口亦箝如何感事氣猶炎落花滿硯慵磨墨乳燕歸梁急
卷簾詩句妄希敲月賈郡符深愧釣灘嚴千愁萬恨都消處笑指鄰
樓一酒帘

桐江集自跋回二十學詩今七十六矣七言決不爲許渾體
妄希黃陳老杜力不逮則退爲白樂天及張文潛體樂天詩
山谷喜之
者在集文潛詩自然不雕刻山谷不敢
也五言回慕後山苦心久矣亦多退爲平易中有閬仙之敲
而人不識也

次韻張耕道喜雨見懷兼呈趙賓陽

疲氓多菜色去守乏棠陰屬慮千峰旱俄聞六月霖
麵灘船欲澁茗

務井還深香潤迴瓜圃聲酣起蔗林炎官初恣肆道喝稍侵尋畏日
方焦野油雲忽冒岑此涼甦萬病厥價倍千金解郡雖逾歲留家尙
至今田登欣米賤屋老懼書淋遙念兒衣醲兼虞婦竈沈淒清傳古
調憂悶豁煩襟拭汗紕練悅搔頭斷玉簪却思穿石罅共坐聽泉音
韭脆鮮鱗縷梅芳煮醞斟一江同照影兩地隔論心疑雪佳公子輸
君日對吟

桐江集自注睦有近城灘民以船載磨治麵城中茶場大井
汲者衆故有麵灘船茗務井之句趙賓陽和予雨夜詩兒童
疑有雪頻起穴窗看故有疑雪佳公子之句

挽委順子王防禦

溫飽逍遙八十餘稗官元自漢虞初世閒怪事皆能說天下鴻儒有

弗如聳動九重三寸舌貫穿千古五車書哀江南賦箋成傳從此韋
編鎖蠹魚

研北雜志方萬里挽委順子王防禦詩云云

甲午元日

端平甲午臣八歲甲午今年又一周六十八年多少事幾人已死一
人留

悵惋詩二首

鸚鵡籠開綵索寬一宵飛去爲誰歡早知黠嫗心腸別肯作佳人面
目看忍著衣裳辜舊主便塗脂粉事新官丈夫能舉登科第可得妖
雛膽不寒

一牝猶嫌將兩雄趨新背舊片時中陡忘前主能爲叛乍事他人更

不忠玉腕空亡無易馬絳桃猶在未隨風何須苦問沙吒利自是紅顏薄老翁

句

菊花與汝作生日螃蟹喚吾入醉鄉 諸公未許子爲政萬事無如
髯絕倫 糟薑三盞酒柏燭一甌茶 跳上岸頭須記取秀州門外
鴨餛飩

癸辛雜識方回徽人也其父南遊殂於廣中回廣婢所生故
其名及字如此喜作詩以放肆爲高有菊花云云又與伯機
爲壽諸公云云糟薑云云又行杖云云甲午元日云云其處
鄉專以騙脅爲事鄉曲無不被其害者怨之切齒遂一向寓
杭之三橋旅樓而不敢歸老而益貪淫凡遇妓則跪之略無

羞恥之心有二婢曰周勝雪劉玉榴方酷愛之而二婢實不
樂也既而方遊金陵寄二婢於其母周姬之家恣開杜陵之
門勝雪者竟爲豪客挾去方歸惟有悵惋而已遂作二詩云
云自刻之梓揭之通衢無不笑者

句

何許中原惟雁見不多吾輩只鷗知 人生不作湖州守亦合移居
住雪濱

梅磴詩話方回吟稿中有云云之句寄興甚遠又舟行苕霅
間嘉其景勝賦詩云云後德祐改元爲吳興倅貳雖少酬所
願亦應不作守之讖

方存心

存心回子

句

村酒僅數行野蔬不盈掬

新安文獻志秀山在嚴陵郡城之內舊有亭曰秀亭辛巳十一月二十七日賓暘適至黃應蟾惟月授小學于塾三人各攜稚子挈繩床命酒至暮雪後霜晴送目無極乃以回兩日前屋宇古詩爲韻回首倡焉秉燭繼之各簪肩索筆書數十聯明日再集又明日復集而一百八十韻成用昌黎鄆城夜宿體長兒存心亦獻數十句惟云云一聯可取而以其儉也不以入篇時至元十八年嘉平朔旦方回萬里序

劉光

光字元輝生宋季有曉窗吟卷

問田夫

清晨出柴扉偶遇耕田夫爲問爾田閒近曾得雨無田夫欣欣言旱
勢早已蘇昨午雲四合一雨半日餘高下粗沾漑兀然藹菑畬老夫
聞此言欣懌當何如

新安文獻志方虛谷曰此詩絕好玄暉學陶故於短篇尤佳

楊公遠

公遠字叔明歙縣人

回溪道中

山東溪流窄徑迂眼前景物入詩無田中科斗古文字柳下春鉏春
畫圖巨室藏茶供客販小旗誇酒誘人沽行行不記幾多里回首林

端日又哺

野趣有聲畫方回跋野趣楊叔明舊與倡和閱前作倏十三年矣叔明能畫能詩筆愈益老而鬚髮如漆獨道貌猶未老也豈胸中有所養而然乎其無聲之詩當求米元章張彥遠輩評之其有聲之畫如回溪道中云云此五十六字溪山村落圖也起句便能摹寫草徑溪流偃側之勢科斗春鉏兩句生逼江西自是兩幅奇畫儲茶誇酒一聯村落中賈區飲肆在紙上歷歷可數尾句收拾却少留不盡之意全篇熟而不腐新而不怪詩妙至此非胸中有所養不能也余老矣不能悉爲提掇佳處舉其一足以知其餘焉至元乙酉月良之朔謹書于孚舟亭

葉梅嶠

荷花辭

未花葉自香
旣花香更別
雨過吹細風
獨立池上月

新安文獻志曹弘齋云此詩故是幽遠

唐元

元號筠軒

藝圃

小園僅百步
花竹藝兩行
垂垂結夏實
蕭蕭吹晝涼
盆池曉更靜
照我鬚鬢長
復有青青蒲
風至互低昂
人生百歲中
弱草棲螢光
亮無貞堅節
何以禦雪霜
達人豈求名
進善貴自強
用世苟不能
退居固其常

舊種竹數十生筍已滿園今年筍更繁
鱗鱗穿隣垣山童斲煙雨便欲供朝餐
獨不忍饑口保此青琅玕物微志則遠
當異今日觀平生遲暮心與爾同歲寒

種莧甲已坼苦菜行亦秀耰鋤不憚勤
常恐地力瘦旦旦望其長灌漑那敢後
牆頭有蓬蒿不種而自茂此意定如何
爲爾吟清晝

新安文獻志筠軒以所作謁虛谷虛谷讀此三詩亟加嘆賞

許古清

先生命題追和古柏行

夔府羈懷悲病柏更尋廟柏摩牲石惠陵遺恨國三分丞相英姿身八尺伊人雖往寸心在大義未伸千載惜月暗叢祠鬼火青霜寒薜樹龍鱗白巴江滔滔日夜東荆榛蕭瑟永安宮虎蛇行陣頑不動魚

水際會俱成空老柯暗泣英雄雨香葉尙鼓旌旗風乃知扶持殆天
意未必呵護勤神功侯生合作明堂棟侯沒猶爲雪山重魏宮晉殿
總銷沈楚舞巴歌代迎送悠悠華表愁歸鶴黯黯蒼梧棲老鳳猶恐
風霆撼石根臥龍奮起當天用

新安文獻志吟社司盟黎芳洲廷瑞批云和者百餘人此卷
韻妥意貫結語亦奇殊不易得

程鉅夫

鉅夫名文海以字行其先徽州人宋末家建昌元兵南下從
季父入覲授管軍千戶官至翰林學士承旨諡文憲有雪樓
集

送程君儁學正歸潯陽

五老催歸客天寒道路長殘冬涉易水幾日到潯陽學見吾宗盛身
隨聖道昌未應嗟晚達松菊近柴桑

新安文獻志道園虞氏曰雪樓詩沖淡悠遠

贈汪郎中

此老今年八十三江濱獨擅漢衣冠文章唧袖龍蛇字鬚髮如霜虎
豹顏耆舊於今足塵土典型留此重家山醴牢略具高年禮萬一神
丹乞九還

雪樓集自跋余解官歸省舟過吳城山下耆舊雕落有慨其
歎忽老人龐眉皓髮衣冠偉然惠詩一卷問之年曰八十三
矣復遺瓜三枚不一語而去余意其異人也坐有潘俊卿謂
余曰此盧潭老人汪郎中也屬余西泝未暇細論令人餽以

羊酒將以此詩至元二十八年龍集辛卯十月十日

七賢過關圖

長庚自是謫仙人子美逢時稷契臣風雪茫茫五君子醉吟猶得繼清塵

懷麓堂集論七賢過關圖者多矣霏雪錄所載差詳蓋黃山谷嘗題之曰眉山老書生作此圖人物各有意態又謂七子者皆詩人不指爲誰某也予觀雪樓程鉅夫集有詩云云又嘗聞吾友倪文毅公岳稱其父嘗見舊圖人各有標目有王維者而不能悉記也

葉李

李字太白號亦愚杭州人至元十四年舉授浙西道儒學提

舉官至尙書右丞諡文簡

癸辛雜識葉亦愚名李先爲葉山所攻後爲李性學所窘遂以此飲恨而死蓋二人正寓其姓名云

口占

如今便一似麻糊也是人閒大丈夫筆裏無時那解有命中有處未應無百千萬世傳名節二十三年非故居寄語長安朱紫客盡心好上帝王書

輟耕錄中書右丞葉公李宋太學生上書詆賈似道公田關子不便專權誤國似道怒嗾林德夫告公泥金飾齋扁不法令獄吏鞠之云只要你做一個麻糊公卽口占一詩云云遂遭黥流嶺南及蒙恩放還與似道遇諸道以詞贈之云君來

元詩紀事卷五
十五
路吾歸路來來去去何時住公田闌子竟何如國事當時誰
汝誤雷州戶匡州戶人生會有相逢處客中頗恨乏蒸羊聊
贈一篇長短句

夢中詩

通明殿逼紫微垣一朵紅雲擁至尊下土小臣勤稽首願將惠澤溥
元元

紀夢

宋時豪士石曼卿帝命作主芙蓉城我才比石十無一半世虛負狂
直名年來似有喪心疾薦共引緜辜蒼生天誅未加公論沸日夕惟
待鼎鑊烹何哉異夢出非想忽遇仙老談真情謂予夙是文昌相漏
泄輕舉遭彈抨帝令墮謫飽憂患且使兩足蹢跚行追思善步不可

得飛昇妙術矧敢輕當時廷議祇如此汝悔當復惟相迎稽首老仙
謝慈愍臣罪當死天子明久之寂滅一大樂蓋棺待盡無他營老仙
笑許汝可教引領直上朝玉京通明大明二宮殿林木蒼翠階瑤瓊
芙蓉爛熳錦欲似帝皇錫以主殿名賦詩奏謝九拜起玉音嘉獎旁
觀榮癡人說夢聊一快我獨知命不少驚只恐才非曼卿敵相見慚
汗應如傾從今閉目需帝召玉樓續記時當成兒孫自有兒孫福與
農報國須勤耕

癸辛雜識葉亦愚右丞辛卯八月初四日夜忽夢老人曰汝
前爲文昌相坐漏泄天機遭謫能悔過當復職引之至通明
大明二殿俾爲主殿之職於是賦詩四章以謝及覺僅記其
一云云於是作詩以紀其事云云明年壬辰二月初六日卒

元淮

淮字國泉別號水鏡臨川人

立春盛雪戲作

玉漏城頭報打春連宵積雪蔽園林
頌春亭畔千夫掃鼓角樓前五尺深
老守拈香幾墜笏營軍攘土勝爭金
擊鞭不見牛踪跡旋叱衙兵撥雪尋

人日書懷

麗日池塘凍水消嫩紅嬌白見芳苗
郊原雪霽東風軟籬落梅殘碧玉凋
便好踏青穿細草不妨携酒驟鳴鑪
遙憐九曲沙堤畔多少鵝黃上柳條

昭君出塞

西風吹散舊時香
收起宮裝換北裝
絨帽貂裘同錦綺
翠眉蟬鬢怯風霜
草白雲黃金勒短
舊愁新恨玉鞭長
一天怨在琵琶上
試倩征鴻問漢皇

楊妃入蜀

楊妃亡國禍根芽
剛道宮中解語花
慣得祿山謀不軌
釀成中國亂如麻
馬嵬坡下東風惡
龍鳳旂前戰士譁
吹落海棠紅滿地
至今猶作畫圖誇

句

問歸行理輕如羽
沿路吟詩有一船
渭川湘水多煙雨
我欲垂釣過一生

金困集謝卓序玩夫立春人日之句而變調氣象寓焉味夫

昭君楊妃之什而公感奮情思發焉至於問歸云云則識公之廉介渭川云云又知公功成身退之志

絕句

截髮搓繩聯斷鎧捲旗作帶繫金創臥薪嘗膽經營了更理毛錐治溧陽

元史類編以軍功顯閩中官至溧陽路總管嘗有詩云云溧陽爲金陵上邑至元十三年升爲溧州繼改溧陽府已升爲路淮到省乞改作直隸州小蘇民力及去任作詩云云其廉退之風可想見

李思衍

思衍字昌翁號兩山餘干人至元間授袁州治中官至南臺

御史

弔李肯齋

天地由來有廢興義無兩大一身輕
封疆社稷若不死婦女鬚眉安
用生紐解三綱重接續灰寒萬劫獨光明
便當配食三閭廟啟迪民彝見太平

庶齋老學叢談潭帥李肯齋芾城將破舉家自刑繼之以火
李兩山使交趾道由長沙弔云云

句

土暗塵昏天水碧風驚雨過女真黃
鬼火光中遺石馬仙盤柱下泣銅人

吳禮部詩話劉因夢吉詠薔薇詩色染女真黃露凝天水碧

又薔薇酒亦用下六字常愛其佳對李思衍昌翁亦有一聯
云云未知孰先後也李又有云云句對亦工

董恢

儼居

白髮蒼頭一腐儒行無轍跡住無廬鄧林萬頃青青木肯爲鷦鷯借
一株

翠閣朱樓鎖揜扉尋巢燕子不能歸落花吹泥東風雨遶遍芳簷無
處依

山房隨筆至元戊寅己卯閒有董恢者江陵人後居太原任
丁角酒稅副使儼屋以居詩云云

湯仲友

仲友名益以字行更字端夫吳郡人宋亡浪迹湖海自號西樓有壯游詩集

過賈相宅

檀板歌殘陌上花過牆荆棘刺簷牙指麾已失鐵如意賜予甯存玉
辟邪破屋春歸無主燕曲池雨產在官蛙木綿庵外尤愁絕月黑夜
深聞鬼車

齊東野語賈氏當國十有六年近世以詩弔之者甚衆吳人
湯益一詩頗爲人所稱云云

龔開

開字聖予號翠巖淮陰人

宋遺民錄附錄居吳之日高郵龔璠爲忘年友時人謂之楚

兩龔以比漢之兩龔

又吳萊桑海遺錄序坐無几席一子名浚每令俯伏就其背
按紙作唐馬圖

瘦馬圖

一從雲霧降天關空盡天朝十二閑今日有誰憐瘦骨夕陽沙岸影
如山

畫鑒近世龔聖予先生身長八尺碩大美髯讀書爲文能成
一家法畫馬尊師曹霸得神駿之意但用筆頗麤此不足耳
畫人物亦師曹韓畫山水師米元暉梅菊花卉雜師古作卷
後必題詩或贊跋皆新奇嘗自畫瘦馬題詩云云六研齋筆
記聖予作瘦馬圖自題一從云云經言馬肋貴細而凡馬僅

十許肋過此卽駿足惟千里馬多至十有五肋假令肉中有骨詎能令十五肋畢現於外非瘦不可因成此相以表千里之異尪劣非所諱也淮陰龔開水木孤清書

自題中山出遊圖

髯君家本住中山駕言出遊安所適謂爲小獵無鷹犬以爲意行有家室阿妹韶容見靚妝五色臙脂最宜黑道逢驛舍須少憩古屋無人供酒食赤幘烏衫固可烹美人清血終難得不如歸飲中山釀一醉三年萬緣息卻愁有物覷高明八姨豪買他人宅侍口君醒爲埽除馬嵬金馱去無跡

鐵網珊瑚翠巖自記人言墨鬼爲戲筆是大不然此乃書家之草聖也豈有不善真書而能作草者在昔善畫墨鬼有姒

元詩紀事卷五
二十
頤真趙千里千里丁香鬼誠爲奇特所惜去人物科大遠故人得以戲筆目之頤真鬼雖甚工然其用意猥近甚者作髯君野溷一豪猪卽之妹子持杖披襟趕逐此何爲者耶僕今作中山出遊圖蓋欲一洒頤真之陋庶不廢翰墨清玩譬之書猶真行之閒也鍾馗事絕少僕前後爲詩未免重用今卽他事成篇聊出新意焉耳

于石

石字介翁婺之蘭溪人宋亡隱居不仕自號紫巖

元詩選紫巖讀史七首中云首錄鄼侯忘紀信不誅項伯戮丁公鄭君不肯更名藉項伯胡爲賜姓劉對仗極工惜全首未稱案尙有百二山河秦地險八千子弟楚天亡亦工

嚴陵釣臺

拋却羊裘入漢庭偶然高臥兩忘形先生無處可伸足太史何煩奏
客星

吳禮部詩話先大父嘗言吾鄉有楊某者好爲詩多俚率獨
釣臺詩可喜云虹作長竿雲作餌纖月沈鉤在江底巨鱗入
手還縱之漢家鼎小難調理紫巖于介翁予早歲所師嘗記
其作云云

紫霞洞

洞門相對是吾家朝看煙雲暮看霞鐵笛一聲山石裂老松驚落半
岩花

句

一局殘碁雙鶴去石枰空倚白雲寒

白雲洞

詩藪勝國吾鄉詩人若干介翁李坦之皆新拔多奇句于在元頗知名如紫霞洞云云白雲洞云云雖自元人語亦豪爽可觀

杜伯高

句

山圍花柳春風地水浸樓臺夜月天

紫巖集鄉人杜伯高昔與諸公飲于湖上得風月一聯予愛其語因爲足成之

呂起猷

起猷字徽之天台人宋亡隱居

詠雪用滕字韻

天上九龍施法水人閒二鼠囓枯藤
驚鵝聲亂功收蔡蝴蝶飛來妙過滕

又用曇字韻

萬里江河凍欲含渾如天地尙函三
橋邊驢子詩何惡帳底羔兒酒正酣
竹委長身寒郭索松埋短髮老瞿曇
不如乘此擒元濟一洗江南草木慚

貧士傳呂徽之天台人居萬山中綜博述詠安貧逃名常漁以自給一日携弊楮詣富家易穀露頂短褐布韞草履值大雪立門下人弗之顧徐至庭前聞閣中語貴遊子弟詠雪苦吟弗就徽之哂焉迺出侮之徽之口占以答無不精美問其

姓字終不言諸子弟曰嘗聞吾鄉有呂處士者欲一見而不能先生豈其人耶曰吾農家安知呂處士因惠之穀怒曰不義之貨我何庸取遂去諸子弟瞰識其所雪霽覓訪惟草屋壁立忽米桶內有人乃徽之妻也天寒無衣坐爲障耳因問先生何在答曰溪上捕魚乃至彼見之徽之臨溪曰少需之得魚易酒飲諸公也俄頃携魚酒至盡歡散別翼日復躡其蹤則已行矣

函史一日携薪芻詣富家易穀值大雪集客閣中分韻賦詩一人得滕字苦吟弗就徽之寒坐因失笑坐客詢之曰何笑也曰偶憶滕王蛺蝶事耳衆知其能詩邀入坐卽席賦有云云之句坐客歎服隨限韻強之賦又立就時宋南多故兵革

方始徽之詩有不如乘此云云之語

許獻臣

案庶齋老學叢談有許獻臣僉事云云

賓月堂詩

人生自是人閒月客亦天邊寄此身彼此虛空無着處誰歟是主復誰賓

七修類稿此詩乃元人梁隆吉者而同時許獻臣集中亦有之此必二人友善一時不知何人誤寫後人因而誤刊耳

YORK UNIVERSITY

JUN 5 - 2001

EAST ASIAN STUDIES

元言終事久三
人主自最久聞其容衣天懸寄出良遊出龍空燕香與繼煥景主更
齊民聖朝以揚言為津冀家場為德大聖聖在國中分間賦詩
宋淵寶夢學盡楚春若題詞發事詩公
若題詞
天淵寶夢學盡楚春若題詞發事詩公
天淵寶夢學盡楚春若題詞發事詩公

